



**Loca Infesta,|| Hoc est:|| De Infestis,|| Ob Molestantes||
Daemoniorvm Et Defvncto-||rvm Hominvm Spiritvs,
Locis,|| Liber Vnvs.||**

Thyraeus, Petrus

Coloniae Agrippinae, 1598

VD16 T 1247

Capita Secvndae Partis. De indiciis atque argumentis, ex quibus conditio
singulorum Spirituum infestantium potest deprehendi, &

[urn:nbn:de:hbz:466:1-61332](#)

DE LOCIS
INFESTIS ALTERA
DISPUTATIONIS PAR S:
IN QVA

ARGVMENTA ATQVE IUDICIA,
Vnde molestantium Spirituum conditio cognoscitur, aperiuntur & discutiuntur.

ISAGOGE IN ALTERAM DISPUTATIONIS PARTEM, de Locis Infestis.

Altera Disputationis pars in peruestiganda distinctione Spirituum, qui molestant, versatur. Cum enim propositum nobis sit modos, quibus ab infestantibus Spiritibus loca purgetur, prescribere: et non eadem ratione omnes Spiritus abigantur, quemadmodum nec una omnium Spirituum est conditio: omnino Spiritus ipsi prius cognoscendi sunt, atque distinguendi, ad quod haec Secunda Disputationis pars seruit.

Non tamen omnium Spirituum, qui apparent, distinctiones hic inquirimus: illos solum, qui molestant, cupimus cognoscere: quia de his solis, non de omnibus, nostra Disputatio est. Alibi quoque de aliorum distinctione tractatum est.

Quoniam autem molestantes Spiritus duplices sunt generis, humani & Dæmoniaci: prima nostra occupatio erit, ut quibus rationibus humani à Dæmoniacis distinguantur, aperiamus: tum deinde, quia humani

humani quoq; duplicitis generis sunt, secundò inquirendum discrumen, quo hi ab illis discernuntur, damnati, videlicet, à purgandis.

Porrò distinctio humanorum Spirituum à Dæmonibus, vel à forma peti potest, qua conspicuntur: vel à strepitu & tumultu, qui excitatur: vel ab oratione, quam ad viuos habent: vel à malis, quæ afferunt: vel ab officijs, quæ præstant: vel à locis, ubi degunt: vel à tempore, quando grassantur: vel ex ingenio mortali, qui Spiritus persequentes sustinēt: vel ex conditione persequentium Spirituum. Nos in singulis, quid verisimile iudicemus, docebimus.

DE NOTIS, QVAE DAEMONVM SPIRITUS ab humanis distinguunt.

C A P . XXVI.

*An, & quæ forma distinguat humanos
Spiritus à Dæmoniacis.*

Horme rationem magni faciendam esse indiscernēdis atq; 1.
distinguendis Spiritibus plerique sentiunt: quorum ut
iudicium temerarium non est, ita leuis animi illud, citra
omnem tergiversationem, admittere. Nos duobus aut
tribus assertis, veritatem concludi existimamus. Primum est, for-
mas quasdam esse omnibus Spiritibus communes; ex quibus pro-
inde certum inter Spiritus, discrimen peti nequit. Alterum, quas-
dam Dæmones prodere. Tertium, quasdam probabiles cōiectu-
ras de humanis Spiritibus facere.

*Humanæ forma omnibus Spiritibus communis est. Illa se viuentium
conspicui offerunt non defunctorum tantum hominum Spir-
itus, verū etiam Dæmoniaci. Quot nos, superius, Spirītūm mo-
lestantium exempla produximus sub humana forma; quorum ta-
men alij humani, alij Dæmoniaci.* 2.

*Facile forsitan, quis sibi persuaderi patietur, humanos esse
Spiritūs,* 3.

DE LOCIS INFESTIS

Spiritus, qui sub *humana* conspiciuntur forma: at non ita facile, sub *humana* latitare Dæmones. At tam facile est Dæmonibus *humana* formam effingere, atque assumere; quam aliam quamcunque. Nec hic maior potestas: nec maior, quam ibi, requiritur industria: nec cognitio maior.

4. Sub *humana* forma visi sunt plures. Primum ille, quem Hildesheimenses Hutgen, à pileo, vocarunt; cuius superius capite meminimus. Deinde duo alii, quorum Alexander ab Alexandre meminit lib. 4. Genialium dierum cap. 19. quorum unus ei se socium præbuit, qui dirum facinus in patrem commissurus, Romanus proficiscebatur; alter Thomam quendam, religiosum, trans flumen portare paratus erat. de quibus cap. 30. de Dæmoniacis. forsitan etiam is, qui Christum, in deserto, tentaturus accessit. Sed & sub *humana* forma sepissimè Sanctos homines sunt aggressi, & de arce sanctitatis eos deiicere conati. Quidam sub specie genitoris accessit VVilhelmū Pictauorum Comitem, & sanctissimum eremici cultorem: ut in eiusdem vita refert Theobaldus, ca. 19. apud Surū Tomo 1. Alius sub specie mariti miserabilis S. Melaniam: apud eundem Surium, eodem Tomo. Tertius sub specie Monachī S. Dominicum: in eius vita lib. 3. cap. 12. Quartus sub specie mulieris S. Iustinam, quam Cyprianus aliquando deperiit: quemadmodum in vtriusque vita scribit Metaphrastes. Et qui B. Vincentio molestus fuit, nunc referebat vastum Aethiopem; nunc venerabilem quedam, aetate grandem, eremitam, teste Petro Rauzanio, lib. 1. cap. 9. in vita eius. Qui verò Monachos tentaturus veniebat obuiam B. Benedicto, medicus videbatur; ut dicitur cap. 30. Vitæ ipsius à B. Gregorio descriptæ. Et nigellus puer visus est, qui molestus fuit S. Clare: ut habetur ca. 13. in vita eiusdem. Et formosissimus miles, qui turpem consuetudinē habuit cum muliere, cuius mentio fit in vita B. Bernardi lib. 2. cap. 6. (Vide de hoc cap. 92 huius disputationis.) Qui Abbatem Nacionem tentauit, puellæ Aethiopissæ, quam ipse olim nouerat, speciem induit, teste Palladio in historia SS. Patrum, Sect. 26. De S. Martino refert Sulpitius in vita eiusdem c. 24. quod eadem nunc in forma Iouis exhibuerit, nunc in forma Mercurij: persæpe quoque simulárit Venerem atq; Mineruam. Et cù m parentes suos sanctus vir visitaturus, præteriisset Mediolanum, eundem Spiritum sub *humana* effigie habuit obuiam, insultans tique, quod semper ipsi esset aduersarius, respondit Martinus: Dominus mihi adiutor, non timebo quid faciat mihi homo. Hoc cap. 4. Sulpitius. Atque ut ex Gentilium historia etiam exemplum depromamus.

Sub

Sub humana, & quidem grandioris mulieris sese exhibuit Curtius Rufo. Rem totam his verbis refert Plinius, lib. 7. Epistolarum, Epist. 27. Tenuis, inquit, & obscurus obtinenti Africam comes h. eserat: inclinato die spatiabatur in porticu, offertur ei mulieris figura, humana grandior, pulchriorq. perterritu Africam se, futurorum pranunciam dixit. Iturum enim Romanam, honoresq. gesturum, atque etiam cum summo imperio in eandem Prouinciam reuersurum, ibi q. moriturum facta sunt omnia. Ita Plinius. Nec Iudeis humana specie Diabolus defuit. Indutus aliquando formam Moy sis, Iudeos accessit, & se ducem iis, in promissionis terram futurum pollicitus est, induxit persuasos ad mare transfretandum: sed plurimi ipsorum vndis inuoluti, suffocati sunt. Vide Sigebertum circa annum Christi 438. Omnibus addamus illum, qui anno Domini 1153. qui in Furnensi agro, pago Egafredi inferioris Germaniae, Gerardum Ducem Betaniæ se mentitus est, & diu multumque variis prestigiis hominibus illusit: qui tandem à Diacono quodam Rodolpho adiuratus, quod erat, immundum se spiritum esse, confessus est. Ita Iacobus Mayerus lib. 5. Annalium Flandriæ, anno 1153.

Quid, quod non humanam tantum formam effingant Spiritus Nequam; sed in Angelos lucis quandoq. transferant? Hörtatur quodam loco Corinthios (2 cap. 11.) Apostolus Paulus, ut sibi à falsis Prophetis caueant: & idcirco putat eos non posse nimium esse cautos; quod sint operarij subdoli transfigurantes se in Apostolos Christi. Nec hoc vult iplis mirum videri; cum etiam ipse Satanus transfiguret se in Angelum lucis. Et sub Angeli specie se exhibuit S. Elphego, Episcopo Cantuariensi: quemadmodū in vita eius scribit Osbertus, eiusdem Ecclesie Episcopus: Apud Surium Tom. 2. B. item Osualdo Vigorniensi Episcopo: apud eundem Surium, Tom. 5.

Sed nec Angelorum forma contenti; etiam Christi simulant speciem atq. imaginem. Cum morti proximus esset sanctissimus Martinus, ea se specie ipsi exhibuit Dæmon; quæ Christum referret: & quan- nisi habitus versipellem prodidisset, fortè vir sanctus deceptus fuisset. Quocirca non deformitatem vultus, quæ nulla erat; sed peregrinum & alienum, à Christo, habitum Dæmoni obiecit dicens: Dominus Iesus Christus non purpuratum, aut diademate renitentem se venturum esse prædictit. In eadem Christi specie se exhibuit Sedundello (cuius in vita Friardi reclusi mention fit apud Gregorium Turonensem, lib. de vita Patrum cap. 10.) atque ut cremum relinqueret;

auctori

auctor fuit. In eadem Valenti, eremi cultori; quemadmodum ad longum describit Palladius in Historia SS. Patrum, Sectio. 28.

7. Nec mirum est, *humanas formas vultusq;* Dæmones effingere: quoniam non ipsis tantum propositum est, vt viuentibus terrorem atque horrorem incutiant: etiam querunt mortalium perniciem, atque animæ interitum; quemcum ficta hominum forma possint procurare; ita humano vultu querunt, vt interimant; quemadmodum peregrinis formis, vt terreat. Hoc primum. Secundum sequitur.
8. *Quadam tamen formæ & facies Dæmones produnt. Quæ verò? Illæ omnes secundi, & tertij ordinis, quarum Thesibus 11. & 12. Capitis decimi noni mentionem fecimus, brutorum, & monstrorum animalium. Produnt, inquam, Dæmones; quia & Dæmonibus optimè conueniunt; &, vt sub his defunctorum hominum Spiritus prodeant, nulla cogit necessitas, nulla ratio probat.*
9. Et quidem optimè Dæmonibus illæ conueniunt: siue fines attendamus, qui Dæmonibus sub his laruis propositi sunt; siue rationes diuinæ prouidentiæ, quæ etiam in hoc negotio non desideratur. Propositum est Dæmonibus terrorem incutere & molestare: annon hic magis ferarum & brutorum horrendæ; quam humana, per se amica, species seruit? Diuinæ prouidentiæ ratio postulat; vt & conditionem suam intelligent Spiritus: quæ ob peccatum miserrima est, atque à brutorum, monstrorumq; vix differt: & vt homines cognoscant, quam à Dæmonibus sibi cauendum sit, quorum exterior etiam & simulata forma, argumenta summæ crudelitatis præbet.
10. Ut sub his formis hominū Spiritus prodeat, nulla ratio cogit. Nam illi, vel viuentiū rebus intersunt, vt ipsorum subsidiis iuuentur, quod purgandis Spiritibus propositum est: vel vt diuinæ iustitiæ in se præbeant testimoniu, & bene, cum sua ignominia, pœnas luant, quas male viuendo contraxerunt: qui finis in damnatis spectatur. Vtrobique; vt forma humana appareat, necesse est.
11. Quod si quandoque peregrinum quid, vel monstruosum in humanis spiritibus obseruatur; tantum illud non crediderim; vt aliam speciem formamque tribuat; propterea, quod, vt diximus, semper hi Spiritus, vt cognoscantur, videantur apparere: cognosci verò nequeant, nisi humanam, & propriam propemodum referat. Hoc secundum.
12. Formæ igitur brutorum atque monstrorum produnt Spiritus Dæmoniorum. Et familiares hæ sunt Dæmonibus, id sequentibus

bus docēmus. D. Basilius in Isaiæ cap. 2. refert illos sēpe homini-
bus petulanter insultare felis, mustela, & canis se discerpentis specie. Al-
uarotus à Minues, Ovieda, & qui Indorum occidentalium mores
scriptis mandārūt, frequentissimos aiunt illis esse Dæmonū occur-
sus, modò hac, modò alia animatū facie se ostendētum. Andreas qui
dam Italus in canis caci & rufi specie secum ducebat Dæmonem, anno
1548. qui vniuscuiusque arcana aperiret, stupendaque alia ederet,
ita V Vesper. in Iustinū. Cornelius Agrippa cacodæmenē nigri ca-
ni formā, quotidianum asseclam habuit, cui collare erat lorū
magicis per clauorum emblemata notis inscriptum. hoc Iouius in
Agrippæ Elogio. Sic Dæmones septem in Nicę ciuitate inter se-
pulchra delitescebant sub forma canis, qui obuios quosque lacesse-
rent, donec eos S. Andreas, rogante populo, in solitudinem exegit;
teste Abdia, in Hist. Apost. Equorum etiam species referunt. Com-
memorat Olaus Magnus lib. 3. Histo. Septent. cap. 19. Hodinum
Danorium Regem, in suum regnum, quo nonnullorum factione
fuerat electus, per immensa maris spacia ab Othini Dæmons in
equi specie esse reductum. Seruit quoque hīc nobis Sagarum con-
fessio. Illarum vna, teste Nicolao Remigio, lib. 1. cap. 7. de Dæmo-
nalia, retulit, cūm se Martinellus suus caphinam inuiseret, modò
aut̄ per sensistram inuolat̄is, modò leporis aut mūris circumcurren-
tis formam induisse. Alia asseruit sub atricani specie à se itidem in
carcere visum: alia obseruatum instar cancri: alia in carcerem illa-
bi consueuisse per cancellos, felis aut pusilla duciuīs bestiæ habitu. Hęc
Remigius. Sed ad tertium.

Tertiō dicebamus Quasdam formas probabiles coniectaras facere;
quod hominum, non Dæmonum spiritus sint, qui viuentibus adsint. In harū
numero vel solam, vel certè præcipuam dixero illam, quæ ita hu-
mana est, vt peregrinum, & ab humana alienū habeat nihil: & nec vlla sui
parte, nec peregrino colore, nec figura, nec habitu, nec gestu aut
morum leuitate, nec mole, nec paruitate ab humana degeneret.

Hanc humani Spiritus indicem esse nullus dubitat. Quid tam
humanum Spiritum repræsentare potest, quam humana forma? &
quidem talis, qualem cūm corpus agebat, & souebat, Spiritus effici-
ebat? Quod verò hæc non facile alium, quam humanum, Spiritum
repræsentet; inde coniectura accipitur; quod sub humana Dæmo-
nes vix conspiciantur, nisi etiam sui aliquod indicium, quadam
humanae formæ deformatione præbeant; ex qua illos, vt ex vngue
Leonem, facile depræhendas.

Hinc est, quod qui vel Spectris territi, vel quovis modo à
R spiritibus

Spiritibus tentati sunt; si præter humanā Speciem notassent nihil; non Dæmonum, sed hominum Spiritus crediderint, qui viderentur. Contrà pro Dæmonibus habuerint; si humana Species vitium aliquod, vel parte sui, vel colore, vel habitu, vel nimia mole, vel exiguitate corporis referret. Non dubitauit esse hominis Spiritum Imperator Nero, qui matrem suam referebat, de quo i. cap. At Thomas Monachus, teste Alexandro ab Alexandro (lib. 4. Genialium dierum cap. 19.) quem se socium itineris hominem habere credebat; tandem deprehendit verum esse Dæmonem; non aliunde, nec prius; quam vbi pedes ipsius transituri vadum, belue non hominis pedes animaduertit.

16.

Ex dictis sequitur duobus modis formam externam Dæmoniorum Spiritus prodere. Alter est, si sub brutorum & monstrorum figura conspiciantur Spectra. Alter, si sub humana; sed tali, quæ vitium quoddam habeat, & ab hominum usitata, quodam modo, degeneret.

17.

Vitium porrò multis modis in forma accidere potest. Aut partis alicuius additione; vt si caudatus sub humana forma apparet Spiritus: aut partis detractione; vt si sine capite, brachiis, vel alia notabili parte; aut figura; vt si pedibus referat leonem, auribus asinum: aut excessu quantitatis; vt si prodigosæ magnitudinis conspiciatur: aut quantitatis defectu; vt si infra omnem humanam appareat quantitatem: aut habitu; vt si peregrino prorsus, & cuius apud homines usus non est, videatur: aut motu corporis; vt si nimium gesticuletur, & incessus dissolutior sit, atque homini minimè conueniens, &c. Itaque dubium non erat, quin Dæmon esset, quem fratres quidem loquentem audiebāt, sed tamen videre poterat nemo; Videbat autem S. Benedictus, teterrimum ut loquitur s. Gregorius, & succensum, & qui in ipsum ore oculisq; flammamib; sequire videbatur, quando s. vir in monte Cascini contriuit Idolum Apollinis, & eiusdem templum conuertit in Oratorium s. Martini. Historiam hanc pluribus verbis refert Cæsar Baronius Tomo 7. Annalium, circa annum Domini. 549. ex cap. 8. lib. 2. Dialog. B. Gregorij.

18.

Et vitiata hominis forma Dæmones frequenter sagis se exhibent. Refert Nicolaus Remigius de Dæmonolatria, lib. 1. capite 7. plurima exempla earum, quæ omni exceptione maius huius rei testimonium dederunt. palamque confessæ sunt facies Martinellis suis fuisse obscuras atrasq; lumen a penitus abdita, & instar flamme micans; oris rictus sparsos, profundos; ac perpetuo olidi sulphurei, aliquid astutæ.

antes

antes: manus strigosas; & villis atq; hamis deformes, pedes corneos bifidosq; statu ram nungam iustum; sed aut breuitate, aut vastitate semper aliqua insolentem; totamq; adeo seriem extra modum. Addidit alia Martinellū se quandoque vidisse capite vel altero pede truncum, mutilum que cum forte saltationes nocturnas vna cum suis agitaret. Hæc Remigius.

Atque ita *deforma*, quæ Dæmoniorum Spiritus prodit. His vnum addo ex iam dicto Remigio (lib. i. ca. 23) inter omnes pecudum formas vnam hirci ipsis gratissimā esse, maximē tum, cùm se obseruantia aliqua sagis calendos exhibitent. Huius dat causam: quod forma hæc moribus ingenioque, ipsorum conueniat. Hirorum, inquit, præter ceteras pecudes nobilitatur *grauelentia*: nulla re tam certo suam Dæmon testatur præsentiam, quam odoris fæditate intolerabili. Hircorum *libidinosa obscenitas* etiam Prouerbio locum fecit: hoc vnum Dæmon præcipue satagit, ut suos rebus venereis quam maximē deditos habeat; & ne desit occasio, ipse se quoties illis occurrit, in eam formam induit, quæ huic usui sit accommodatissima. Hircorum in obuios quoque sæpe profusa petulantia est: nulla non obit, ac pererrat terraruni loca Dæmon, dum offendat, in quem impetum incursumq; faciat. Hirci *saliua fructibus* venenum est, teste Varrone lib. i. de Rustica, cap. 2. eiusque dentes satis intcritus ab pestis præsentissima: Satān & viperinus morsus est, afflitus lethalis & exitiosus. Hirci *obtutus trux & ferox*, frons cornibus aspera, barba promissa & inculta, villi temere pendentes, succincta crura, totus habitus corporis ad fæditatem comparatus: & hæc Dæmoni conueniunt. Vide plura, si placet, apud Remigium.

CAP. XXVII.

An, & qui strepitus humanos Spiritus à Dæmonibus distinguant.

Altera ratio, qua Spiritus depræhenduntur, est strepitus & qui se in aures insinuat, sonus. Et quia eadem quandoque solet esse ratio veri distinctionis, quæ cognitionis, utrum ex strepitu excitato, & simulatis clamoribus deprehendi valeat, qui Dæmoniorum sunt Spiritus, qui hominum, hoc capite explicandum est.

Diximus superius varios esse, qui à spiritibus excitantur, sonos: verum duobus generibus comprehendividetur omnes. Qui-

dam specie habent eorum, qui non nisi a viuentibus excitatur: ut sunt vox, clamor, risus, gemitus: quidam nudi sunt soni, & rebus quoque vita destitutis conueniunt. An forte priores illi humanos spiritus produnt, posteriores Dæmones? Non hinc distinctio spirituum perfecta sumitur. Dæmones, ut nudos, siue non viuentium sonos, ita viuentium perfectè excitare possunt.

3. Rursus viuentium soni duplicitis sunt generis: alij articulati; alij confusi, siue non articulati. Illi proprii sunt hominum; hi etiam brutorum animalium. An forte ex illis spiritus deprehenditur manus; ex his Diabolicus? Quidquid sit de his posterioribus, priores illi non solis hominibus tribuendi sunt: quo circa nec solos homines produnt. Esto vox vera, articulataque homini conueniat: at vox non vera, quantumvis articulata, qualis hic est, dæmonibus conuenire potest.

4. Forte sonus articulatus talis, qui conceptus mentis est index, si audiatur; ab humano tantum erit spiritu, humanumque spiritum probabit? Nec hoc dici potest. Qui possunt edere sonos, Diabolici spiritus; possunt & articulatos sonos: & eos, qui mentis atque conceptum indices sunt, formare.

5. Est in sono alia differentia, qua alij acuti, alij graues dicuntur. Vtrique excitantur a spiritibus: vtrique auribus viuentium hauriuntur. Verum quemadmodum iam dicti spiritus non produnt; ita neque hi. Possunt acuti & graues excitari a spiritibus humanis: possunt excitari a dæmonibus.

6. Præterea sunt quidam, qui grauiter audientium aures perstringunt: sunt alij, qui suauiter afficiunt. An forte illi produnt crudeles, & truces Dæmones; hi, si non omnibus, saltem aliquibus defunctorum hominum spiritibus sunt proprii? Nec hoc quidem. Qui in Angelos lucis se transferunt Nequa spiritus; non possent Angelorum etiam linguis loqui, & aures demulcere.

7. Nicolaus Remigius lib. I. de Dæmonolatria cap. 8. ex duplice voce videtur docere Dæmones prodi. obscura atque exili siue debili. Prius probat exemplis Maleficarum plurium, quæ dæmonibus suis Martinellis confessæ sunt vocem esse, qualem emittunt qui eos in dolium, aut testam rimosam insertum habent: alterum testimonio Hermolai Barbari, qui teste Petro Crinito, li. 7. de honest. discipl. cap. 2. testatur a se auditam fuisse vocem subfibilantis Damonis, cum ille forte de Aristotelis Entelechia interrogatus, sibi & Georgio Placentico respondisset. Ad hec accedit, quod Pfeillus li. de dæmo. docet Dæmones dedita opera tenues & exiles voces edere, vt eo-

rum:

sum mendacia propter indistinctam illius obscuritatem minus deprehendatur. Et Gennadius Patriarcha Constantinopolitanus vocem confusam inaudiuuit Spectri ad altare nocte stantis, cum ille id iurgabundus increpasset, ut Cedrenus, Calistis, & Theodoreetus in additione ad Zonaram. Tom. 3. lib. 1. collectan. Histo. Eccles. scriptis suis testatum relinquunt. Assyriorum etiam & Chaldeorum λεχανομουσικα hoc praestare solebat, ut Dæmones è pelui stridula voce & tenuisibile verba ederent. Hæc & his similia dicto loco Nicolaus Remigius. Sed non hoc sine ab ipso sint dicta, quasi hac vocu differentia Dæmoniorum Spiritus velit distingui ab aliis Spiritibus. Omnibus spiritibus dictæ voices possunt conuenire. & ut dictæ conueniunt Dæmonibus, ita dictis contrariæ possunt iisdem conuenire. Solum docet Remigius Dæmones dictas voices in assumptionis corporibus edidisse.

Veruntamen, quamvis ex iam dictis Spiritus humani à Dæmonibus non distinguantur; quidam tamen soni sunt & strepitus; qui solis Dæmonibus videntur conuenire: quidam, qui probabile indicium præbent humanorum spirituum: ex quibus proinde aliquia spirituum discretio, atque differentia peti potest.

Duplices verò sunt, qui Dæmones habent autores. Principio illi, qui non nisi bruta animantia atque horrenda monstra referunt: dum deinde, qui cum ingenti tumultu sunt, & corporum magna agitatione atque motu:

Vtrique vix alios, quam Dæmones, possunt habere authores. Sed & solis Dæmonibus conuenientissimè tribuuntur. Priors quidem, quia non alia horum tumultuum, & sonorum, qui à spiritibus excitantur, ratio; quam formarum peregrinarum, atque monstrorum. Quemadmodum igitur formis se visui obiciunt, & insinuant: ita brutorum animalium, & monstrorum effectis vocibus auditui. Postiores verò, partim quia solum ob molestiam afferandam excitantur; quæ præcipue in locis infestis ab infernali bus spiritibus queritur; partim, quia sèpe humanis viribus fieri nequeunt.

Accedit quid nullus ratio cogat; ut hos tumultus & brutorum animalium inconditos clamores humanis spiritibus tribuamus. Quibus enim tribuemus? Purgandis? At quod illis, dum ad nos redeunt, propositum est, non hos clamores exigit. An damnatis? At quauis molesti esse cupiant; quis tamen dininæ prouidentiae ratio postulat, ut magis se prodant, quam noceant; potius humanos, ut ita dicam, tumultus & sonos, quam brutorum excitare dicendi sunt.

Atque

11. Atque hinc est, quod sancti viri præsentiam Dæmonum deprehenderint ex baritu, sibili, rugitu, v lulatu, grunitu, & his similibus brutorum animalium vocibus. Vide caput 19. præsentis Disputationis. Hoc etiam modo se prodidit spiritus Nequam in domo quædam apud Corinthios, quam Dacius Episcopus Mediolanensis aliquando inhabitauit. Rem totam ex 3. Dialog. cap 4. verbis B. Gregorij ascribimus. potest enim pluribus locis in hac Disput. seruire. Tempore igitur Iustiniani, cum Dacius urbis Mediolanensis Episcopus, causa fidei exactus, Constantinopolim pergeret, Corinthum deuenit. Qui cum largam domum ad hospitandum quereret, que comitatum eius totum ferre posset; & vix inueniret; aspexit enim domum congruentis magnitudinis, eamq; sibi præparari ad hospitandum iussit. Cumq; eiusdem loci incolæ dicerent, in ea tunc manere non posse; quia multis iam annis eam Diabolus inhabitaret; vir Venerabilis Dacius respondit dicens: Imò ideo hospitari in eadem domo debemus, si hanc malignus spiritus inuitat, & ab ea hominum habitationem repulit. In ea igitur sibi parari iussit, securusq; illam, antiqui hostis certamina toleratus intrauit. Itaque in tempesta noctis silentio, cum vir Dei quiesceret, antiquus hostis, immensis vocibus, magnisq; clamoribus cœpit imitari rugitus leonum, balatus pecorum, ruditus asinorum, sibilos serpentum porcorum grunitus, stridores sororum. Tunc repente Dacius, tot vocibus excitatus, surrexit, vehementer iratus; & contra antiquum hostem magnus cœpit vocibus clamere dicens: Bene tibi contigit, miser. Tu ille es, qui dixisti ponam scđem meam ad Aquilonem, & ero similis altissimo. Ecce per superbiam tuam poris & orictibus similis factus es. & qui imitari Deum indignè voluisti; ecce, vt dignus es, bestias insitaris. Ad quam eius vocem Dæmon erubuit: & fidelium habitaculum domus facta est. abscessit q; mendax & infidelis spiritus Hæc Gregorius: & post eum Baronius Tom. 7. anno 540.

12. Interim tamen, inter duos iam dictos modos, ex priori certius argumentum desumi dixerim, quam posteriori: quamuis forte nec prior ita sit certus, vt exceptionem nullam admittat. Miserrima damnatorum conditio fortassis hos quandoque clamores exprimit. Nequitia etiam eorum summa efficit, vt cum mortalibus nocere desiderent, etiam hos tumultus, qui ad nocendum magis accommodati sunt, edant.

13. Sed Quomodo humani hic Spiritus deprehendantur, dicamus. Vnum ego hic sonū pro ipsis non leue argumentū præbere existimarem; illum videlicet, qui tristis animi, certa quædam signifi. atio est; vt sunt suspiria, gemitus, fletus, illachrymationes. Quamuis enim hæc etiam Dæmones possint habere authores; humani tamen propria vide

videntur: humanis magis conueniunt: & humanis magis, quām
Dæmoniorum Spiritibus seruiunt.

Propria videntur esse humanis. quoniam gemere, flere, lachry-
mari hominum sunt propria; vt ob id, quemadmodum ex pro-
pria hominis forma haud leuè; ita hinc, si non magnum, aliquod
saltem argumentum sumi debeat.

Humanis magis conueniunt, propterea, quod testificatio sint
prementis doloris, quem vt præ aliis, exprimant humani Spi-
ritus, Deus in hoc Spirituum ad nos reditu postulare videtur; nimi-
rum vt sic defunctorum miseras mortales intelligent: & ipsorum
exemplo edociti sibi caueant, melioraq; sectentur: quæ Spirituum
diabolicorum planctu & ciulatu, qui alterius ab hominibus natu-
ræ sunt & conditionis, non ita commodè præstari posse videban-
tur.

Sic suspiria hæc atque gemitus, non tam dæmonibus seruiunt, 16.
quām humanis Spiritibus: si non omnibus, profectò bonis & pur-
gandis. Etenim ad commiserationem excitandam omnino apta
sunt. Quidni igitur iis tribuenda, quibus misericordia fieri potest?
At dæmoniorum Spiritus, & misericordia indigni: & misericor-
diam nullam sperant: sperant autem, & digni sunt Spiritus pur-
gandi.

C A P . X X V I I I .

*An, & quæ oratio distinguat humanos & Dæmo-
niorum spiritus inter se.*

N On strepitus solùm, tumultus, & incondit soni audiun-
tur à Spiritibus excitati: audiuntur & *orationes*, quas ad
homines habent: & ob id præsens Disputatio postulat, vt
non strepitus tantum; verùm etiam *orationes* inuestige-
mus: vt, Vtrum illæ quoque aliquod discrimen suppeditent, in-
telligamus.

Et quidem si vnius generis essent omnes *orationes*, frustra hīc
labor susciperetur: (in vna enim eademque oratione, & quæ sibi
semper est similis, quod discrimen constituas?) nunc quia ora-
tionum genera sunt plura, non potest esse inanis hæc Disputatio:
forsan etiam èd diffīcilius, quo genera sunt plura.

Sunt *orationes* quædam *enunciatiæ*; in quibus verum est vel
falsum. Sunt aliæ *non enunciatiæ*; quæ quamvis perfectum sensum
contineant, non tamen verum significant aut falsum. Rursus prio-
res, vel præteritum tempus respiciunt, vel præsens vel futurum.

Postero-

DE LOCIS INFESTIS

Postiores autem nunc deprecatiæ sunt, nunc imperatiæ, nunc interrogatiæ, nunc optatiæ, nunc vocatiæ. Præterea omnibus potest accidere, ut vel bonæ sint, vel malæ, &c.

4. Et omnes haec orationes à Spiritibus habentur: Et, quod magis est, ab omnibus omnes possunt haberi. quocirca & de omnibus examen posset institui. Verum, quoniam res propemodū esset infiniti negotij; aliquas, quæ familiariores sunt Spiritibus, & discrimen inter ipsos certius prodere videntur, discutiendæ sunt.

5. Hæ sunt, aperte malæ: ad bonum hortatoria: boni petitoria: occultorum reuelatoria: & vana: siue, quæ non nisi ostentationis causa, aut leuite suscepitæ sunt.

6. Hæc genera. In singulis generibus species plures. Aperte male sūt, quæ vel in iniuriā cedūt Dei: vel proximis incōmodāt: vel ad hæc inuitant. Primi generis sunt blasphemiae: secundi diræ imprecations, conuictia, contumeliae, detractiones, mendacia, turpiloquia, & si quæ aliæ. Tertij, quæ ad dictos quoquis modo ducunt.

7. Ad bonum hortatoria, pro bonorum serè generibus multiplices sūt: sed tamen illorum propriè bonorum sunt, quæ sunt libera, & per nos quoquis modo præstantur: ut sunt eleemosynæ, ad Deum oratio, iejunium, & quarumcunque virtutum officia, &c.

8. Boni petitoria, orantis bonum attendunt. quæ & ipse, pro genere bonorum, distribuuntur; & apud spiritus, potissimum cernuntur in operibus ijs, quibus iuuari possunt: ut sunt peregrinationes, sacrificia, orationes, opera misericordiæ corporalia, &c.

9. Occultorum reuelatoria, vel præteritum tempus respiciunt, vel præsens, vel futurum. Horum enim, quamvis quædam, natura sua occulta non sint; pro ratione tamen cognoscentium occulta esse possunt. Cum his secreta cordium, quorumcunq; coniunxero.

10. Vanas orationes vocamus, in quibus dictorum nihil propositum est: sed quæ ioci aut leuitatis causa lusciuntur; & vix aliud, quam loquentium ostentant actiones. Hæ generum species. An his humani Spiritus distinguuntur à Dæmonibus?

II. Si aliqua oratione distinguuntur; non nisi boni petitoria, atq; occultorum reuelatoria distinguuntur. Illa ex se est humanorum Spirituum: Hæc ex se propria Dæmonū. Cetera tres & Dæmonibus, & humanis Spiritibus (quamvis non omnibus) communes sunt.

12. Tria igitur, ut sua huic assertioni veritas constet, demonstranda sunt. Primum est, esse tria orationum genera, quæ communia sunt Dæmonibus, & humanis Spiritibus quibusdam: quæ ob id Dæmonum

vnum spiritus ab humanis, vniuersè, non distinguūt. Deinde, vnū genus solis Dæmonibus competere. Tertiū, vnum humanis spiritibus esse proprium, & ob id ex his duobus discrimen inter humanos atq; Dæmoniorum spiritus peti posse. Doceamus singula.

De aperè malis, quod Dæmonibus sint familiares, certum est. Quidni aperte malas affectarent, quorum studium est, vt etiam ex se indiferentes; etiam ex se bonas adulterent? sed & nulla est, in vniuerso malarū genere, quam refugiant: nulla, quam non aliquando usurpent. Primi & Secundi generis ab ipsorum ingenio non abhorre, in Dæmoniacis probant, per quos plaustra blasphemiarum, cō uitiorum, detractionum, & mendaciorum quandoq; euomunt. Exempla in promptu sunt. Quidam ipsorum à Theodoro Archimandrita ejiciēdus ex puella, quam 28. annis miserè vexārat, ipsum vocat meretricis filium, quemadmodū in Theodori vita testatur Georgius presbyter, apud Surium Tom. 2. Alius meretricem clamabat sanctissimam virginem Euphrasiam, cùm sibi vim à virgine afferrī sentiret. Et hoc in eius vita, Tom 2. apud Surium. Sic in conuitia effundebatur ille, quem s. Maltouius Episcopus eiecit, cuius res gestas describit Sigebertus Monachus. Ab alio debuit Bernardus audire quodd porcellos ederet, & deuoraret brasicas habetur in vita eius lib. 2. cap. 4. Et Benedictus cum aliquando importuno Spiritui non responderet, Maledictus ab eodē, per summam contumeliam est vocatus, teste B Gregorio. Hæc pro primo & secundo genere. Pro tertio genere sunt, qui molestārunt SS. Melania atq; Claram: Vincentium atq; Sedundellum: vt alios inumeros præteream. Melaniæ persuadere conati sunt, vt relicta fide orthodoxa, sectaretur blasphemiam Nestorij, vt in eius vita habetur apud Surium, Tomo 1. Claræ, vt de studio orandi aliquid remitteret. & hoc apud Surium Tom 4. Vincentio, vt relicta sequiori vita disciplina, genio in florida ætate indulgeret, teste Petro Panormitano, lib. 1. cap 6. in vita eiusdem. Sedundello, vt valefaciens eremo, patrandis miraculis operam nauaret, quemadmodum habet Gregor. Turonens. in vita Friardi ca. 10 lib. de vita Patrum. fuit aliis quidam, cuius cap. 92. nequitiam referemus, qui fœdissimum coitum mulieri cuidam suasit, & persuasit.

Veruntamen quamvis hæ Dæmonibus familiares sint, non tamē solis sunt familiares. Etiam damnatis defunctorum Spiritibus cōueniunt Non refugiunthi blasphemias; quibus datum est os loquens magna & blasphemias. Apocal. 13. Non refugiunt mendaces; qui socij sunt

Q

DE LOCIS INFESTIS

122

sunt Patris mēdiorum. Non mali imprecatorias; qui omnes vel-
lent esse socios pœnarum. Non calumniatorias, aut detractorias,
qui, vt Dæmones, magna erga viuentes flagrant inuidia, &c.

f. Hortantur etiam ad bonum aliquando Dæmones. Non quod bene no-
bis velint; sed vt sub specie boni elaqueant, & decipiāt. Itaq; ad bo-
na malè hortantur. Non curant versipelles, quid agant miseri mor-
tales; bonum an malum; modo operum authores perdant, & ad æ-
terna supplicia pertrahāt. Iohanni Garlino Eremitæ, cuius Thesi 10.
cap. 14 mentionem fecimus, quidam suasit, ne filiam comitis Bar-
celonensis Guifré, quam ille in sui custodiam susceperebat, à se dimit-
teret, magnoq; animo contra carnis tentationes certaret: verū
fornicationis atq; homicidij subsecuta vitia veteratoris animum
prodiderunt. Sic alius Iustinæ egregiè suasit virginitatem; verun-
tamen ita, vt proposita difficultate & periculo auerteret virginem
à virginitatis proposito. quemadmodum in eius vita scribit Meta-
phrastes. Alius sub forma puellæ in Eremo errantis, S. Victorino
Episcopo vrbis Aminternæ, cùm eremum incoleret, commenda-
uit hospitalitatem, atq; vt sibi, nocte instantे, in eadem cella per-
manere; & contra bestias tutò esse liceret, rogauit: & persuasus vir-
sanctus, luxuriæ crimen incidit. Ita Ado Treuirensis in Martyrol.
Et fuit, qui doceret s. Gutlacum Anachoretam, leuiores esse pro-
fancto viro abstinentias biduanas, aut triduanas in hebdomade:
mulandum esse iejunium quadraginta dierum Moysis & Elié: sci-
licet, vt graiori abstinentia vitam abrumperet. Apud Surium
Tom. 2. in eius vita. Hæc causa fuit, quæ B. Antonium mouerit, vt
etiam bona consulentibus Spiritibus non putauerit acquiescendū.
Si orare, inquit, compellunt: si iejunia suadent, non ex eorum nos meritis:
id agamus, sed ex nostra consuetudine. Ita de Antonio, in eius vita, A-
thanasius.

6. Et in hoc Dæmonum emulatores sunt mali hominum Spiritus. Depre-
hensum est, hos quoq; sua oratione, aliquibus bonorum fuisse au-
thores: verū peruerso animo, prauo nocendi studio. Cuius hoc
clarum argumentum, quod, vt Dæmones, bene agant nihil; vt sa-
pius ex B. Gregorio dictum est.

7. Tertium orationum genus, à quo nec Dæmones, nec damnato-
rum hominum Spiritus abhorrent, est; quod vanitatis seu leuitatis est
plenum. An hoc potest alienum esse à Dæmonibus; qui à Domino.
(Iohan. 12.) Principes dicti sunt mundi? mundi, in quo vanitas vanitatum,
& omnia vanitas? Eccles. 1. An à damnatorum Spiritibus? quorum stu-
dium,

diūm. & ēor (cuius oratio index est) dum viuerent, in vanis mundi
rebus, & negotijs fuit totum.

Non igitur hæc orationum genera humanos Spiritus à Dæmo-
nibus distinguūt, quia nec solis conueniuut humanis; nec solis Dæ-
moniorum Spiritibus, quemadmodum demonstratum est.

Licet verò totum Dæmoniorum genus, à toto humanorum Spi-
rituum non distinguant; distinguunt tamen totum Dæmoniorum
genus ab aliquo humanorum spirituum: illis scilicet, à quibus De-
us purgatorias pœnas exigit. His nec conuenit oratio aperte mala:
quia peccare non possunt: Nec quæ ad bonum, malo fine hortetur:
quia hæc peruersa est. Nec vana aut leuis: vt qui, quæcumque lo-
quuntur, magno cum consilio & ratione loquantur.

Porrò occultorum reuelatrix oratio (si tamen vera sit, & non
falsa) pulchre Dæmones ab hominibus distinguunt. quia & Dæmones
hæc possunt: & homines, quia ignorant, reuelare non possunt.
Credendum non est, quod Spiritus defunctorum, non beato-
rum, corporibus exuti, mox plus vi cognoscendi hæc valeant, a-
deoque cognoscant hic, quam valuerint, & cognoverint corpo-
ribus inclusi. Cùm igitur corporibus inclusi, occulta, per se, non
cognoverint, & reuelare nequierint; poterunt corpora exuti?
At Dæmonum scientiam occultam non latent. Multis viis & ra-
tionibus ex iis quædam assequuntur: quemadmodum norunt
docti. Quocirca & quæ tempore Romani Argiopoli Impe-
ratoris in Tracensi prouincia, apud radices montis Cuzenæ, vox
miserabilibus eiulatibus & lamentis à Mense Martio ad Iunium
exaudita est, & clades Romanorum in Celisyria portendit,
Dæmones, non humanos Spiritus prodidit. De hac Cedrenus.
Sic Dæmonium fuisse dicimus, & non humanum spiritum, qui
Curtio Rufo prædixit, futurum; vt Romam proficeretur:
honores ibidem gereret: & cum summo imperio in Africam re-
diret, de quo Thesi 4. ca 26. ex Plini lib. 3. Ep. Sic deprehensus
est esse Dæmon, ille, qui se Duxerat Betaniæ Gerardum dice-
bat, in agro Furnensi pagi Eggafredi, cuius mentio facta est
Thes. eadem, eodem capite. postquam occultum quoddam cri-
men inter Hillinum quendam religiosum virum, quod ille
in iuuentute cum Theta virginem commiserat, prodidit. Rem pro-
lixius describit Iacobus Meyerus lib. 5. Annalium Flandriæ, cir-
ca annum Domini 1153.

Et oratio, boni petitoria, humanos Spiritus (quamvis non om-
nes) 11.
Q. 2

224
nes) à Dæmonibus distinguit. Quid ita? Quia Dæmonibus, ut aliquod sibi bonum petant, non conuenit: & si petunt; simulatè, non verè petunt. Verùm de hoc, posterius Capite quadragesimo.

CAP. XXIX.

An, & quomodo molestijs, quæ afferuntur: & malis, quæ inferuntur, Spiritibus authoribus: possint distingui humani Spiritus à Spiritibus.

Dæmoniorum.

1. *Acilè aliquis in illam sententiam concesserit, vt ex malis & molestijs, quæ à Spiritibus afferuntur, nullum putet discrimen, quo humani à Dæmonum distinguantur, posse deprehendi: Non solùm idcirco, quòd iam humani, quàm Dæmonum possint esse molesti; verùm etiam, quòd vtriq; magna aliquando mala & detrimenta attulerint.*
2. *Sunt molesti, sine vlla corporis lësione, Dæmonum Spiritus. Res est clara quotidianis exemplis: & si vetera postulantur; probant inter alios, Spiritus, qui, in Scotia, arcem Sterlingi, gemitibus horridam reddiderunt. de quibus cap. 1. Sunt quoque, sine vlla corporis lësione, molesti Spiritus humani. vt probat Cleonicæ, Byzantinæ virginis Spiritus; qui sola sua præsentia grauis fuit Pausanias Spartenorum Regi. quemadmodum dictum eodem primo Cap.*
3. *Inflixerunt vulnera Dæmonum Spiritus. Expertæ sunt hoc, & suo malo probant, Virgines Verretensis Monasterij: & qui ex fodina Georgiana sublatus est operarius. de quibus 1. cap. Et humanos Spiritu infligere posse, atque adeò infligere; probat Spiritus matris Neronis; qui, vt Suetonius loquitur, aliquando verberibus furiarum in ipsum sauij, Confirmant idem exempla Petri Apostolorū Prioris, & B. Virginis Matris. De Petro refert Beda, lib. 2. cap. 6. historiæ Anglorum, quòd Laurentium Cantuariensem Episcopum, à grege tenero, & Christo recens initiato, fugam meditantem, nocte flagellis ceciderit. De Virgine Matre Nicephorus, lib. 18. cap. 33. quòd impio cuidam hospiti dormienti astiterit; verbis primum perstrinxerit; deinde vimine eius genua, circum circa velut exarans, circumscriperit; ille verò à somno excitatus, à reliquo corpore disrupta inuenierit: & iustum Dei iudicium, non oris solùm testimonio, sed corporis quoque habitu promulgauerit.*
4. *Attulerunt mortales Dæmones. Exemplo sunt illi, de quibus 1. cap. duo-*

duodecim, quos Annebergicus Spiritus uno flatu interemit. Et si mortem non attulerunt; posse afferre *humanos Spiritus*, docent exempla sanctorum hominum (quorum Spiritus quidni possent, quod ipsi?) exempla, in quam Petri Apostoli; qui mortis Ananiae & Saphirae: Eliae, qui quinquagenariorum; Eliasi, qui puerorum quadraginta duorum authores fuerunt. Act. 5. 4. Reg. 1. 4. Reg. 2. Sed ad rem magis faciunt duo, quae adiungimus Exempla. Primū refert Gregorius Turonensis lib. 5. Historia Francorum cap. 5. his verbis: anno quinto Episcopatus sui (loquitur de Pappolo, Episcopo Lingoniensi, qui gregis sibi commissi nullam curam gerebat) ~~dam~~ dioceses & villas Ecclesie circuiri, quadam nocte dormienti illi apparuit vultu minaci B. Tetricus (Tetricus hic Pappolum in Episcopatu præcessit, & officio boni Episcopi egregie erat persuasus). Cui ita. Quid tu, inquit, hic Pappole? ut quid sed m meā polluis? ut quid oues mibi credit as dispergis? Cedo loco re linque sedem abscede longius à regione. Et hæc dicens, virgam, quam habebat in manu, peclori eius, cum iactu valido impulit. In quo ille euigilas, dum cogitat quid hac esset, fixè in loco isto desigatur, ac dolore maximo cruciatur abhorret cibum potumq; & morte iam sibi proximam præstolatur. Quid plura? Tertio die, cum sanguinem ore praæceret, expirauit. Hæc Gregorius, & post Gregorium Baronius An. C. 552. Alterum huic haud ita multum ab simile refert Ioannes Naucerus, generat. 34. Vdo quidam Magdeburgensis fuit Episcopus; qui cum cura Episcopatus deposita, totus libidini, cum Deo consecrata virgine vacaret, primùm hac voce (Cessa de ludo, lusisti iam fatis Vdo) vt desistat admonetur: deinde vbi peccatum peccato iungit, de latere concubentis secum scorti detrahitur. adducitur mox in sanctorum, qui in choro Ecclesie S. Mauritij considere vidi sunt, consilium: accusatur apud Filium à Virgine Matre: damnatur capit is: à Pugile decollatur. Rem totam, prout oculis conspexit narravit Fredericus quidam eiusdem Ecclesie Canonicus: factique testimonium hodie præbet cruor Vdonis in marmore candido exceptus.

Incommodariunt bonis foriuna Dæmones. Job id suo magno, sed tamen felici, malo didicit. Experti sunt idem ab infestante Spiritu Bingenses plurimiq; alij, quorum 1.ca. meminimus. Et quidni possint *Spiritus humani* idem in bona externa, quod valent in bonacorporis in corpora ipsa?

Hæc à nobis allata, in præsenti argumento, difficilem faciunt inter Spiritus diiudicationem. Et forte non errauerit, qui mala nulla esse crediderit, quæ nunc non à Dæmonibus afferantur; nunc

Q. 3.

non

non ab humanis Spiritibus, si non omnibus, saltem ab aliquibus.

7. Interim tamen saluo melius sentientium iudicio, et hinc aliquod discrimen accipi posse; & esse quædam mala, quæ Spiritus distinguant, existimarem. Quæ illæ quæ videlicet, non ab hominum Spiritibus afferuntur; sed à Dæmonibus: quæ ob id, quia Dæmonum propria sunt, hoc ipso demonstrabunt & arguent Dæmones, non humanos spiritus; quia ipsorum authores Dæmones sunt; nō humani spiritus.

8. Quocirca hic modus cognoscendi, & distinguendi Spiritus contrarius est illi, qui, Capitibus præcedentibus, explicatus est. Ibi demonstratum est ex iis, quæ conueniunt tantum humanis Spiritibus, humanos cognosci, & à Dæmonibus distinguiri: hinc ex iis, quæ dæmonibus tantum conueniunt, cognosci & distinguiri Spiritus Dæmoniorum ab humanis docebitur.

9. Principio igitur Dæmones crediderim illos spiritus, qui mortis hominum sunt authores. Certè hos mortem posse afferre, dubium non est. Non est potestas, quæ comparetur eis, Job 41. Dubium quoque non est, ipsos hominum mortem desiderare. Probat hoc implacabile odium, quo genus humanum prosequuntur. Sic certum est re ipsa mortem aliquando attulisse. Exempla huius plurima sunt. Quod verò soli afferant, & conditio mali, quod morte affertur, videtur postulare; & ipsorum Dæmonum officium.

10. Mors malum graue est: nec, nisi Dei singulari prouidentia, à Spiritibus affertur. At diuina prouidentia, quemadmodū non per seipsum res administrat, ita neque administrat per quasvis creaturas. Habet administratorios Spiritus, Angelos, in similibus officiis. per Angelos igitur, quando ita expedire iudicauerit, mortem infliget.

11. Quod si conditionem Spirituum humanorum attendamus, clarius quod diximus, intelligemus. An forte purgandis propositum est, vt interimant? Nequaquam. Ut prodelle per se non querunt; ita nec nocere. Suam tantum causam agunt. suum querunt bonum priuatum. An propositum damnatis? At vt velint maximè, forte tamen per vires non semper vt afferri videmus, afferre poterunt: & vt possint, quia tamen non adsunt viuentibus, vt diuinæ iustitiae sint ministri, (hoc officium Angelorum est) non per ipsos, si quando affertur, mors afferri dici debet.

12. Quod si quandoque Spiritus humani mortem intulisse legitur, illos ego nō autoprosopos, sed speciem tenus tantum humanos dixerim. Dixerim Angelos (nunc bonos, nunc malos) qui formas certas hominum finxerint; reuera autem Augelici spiritus fuerint.

Nec est

Nec est, quod quis h̄ic mihi beatorum hominum Spiritus
obiiciat, qui mortis viuentibus fuerint per seipso authores.
Primum enim, qui illi? siue, quorum spiritus fuerunt? Deinde ut
illi iutulerint; nostra tamen non euertitur assertio: quoniam non
de felicibus; sed miseris questio h̄ic est. Quid quod forsitan, non
malè negetur beatorum spiritus per se mortem intulisse? Quem-
admodū enim, teste B. Augustino, lib. de Cura pro mortuis, etiam
ip̄i autopropositos personaliter praesentes s̄pē non sunt, vbi præ-
sentēs videntur; ita s̄pē mortem per se non afferunt, vbi mortem
iudicantur afferre.

Ministerio bonorum Angelorum s̄pē forsitan hoc sit, qui
Sanctorum hominum imagines exhibent. Illi s̄pē mortem infe-
runt, idque sub Sanctorum Imaginibus & forma, ita Deo dispo-
nente: ut etiam ex his Imaginibus colligant mortales, quo in ho-
nore habendi sint, quos Deus in cœlestis Hierusalem ciues assu-
mit, & cohæredes vult esse Unigeniti sui dilecti Filij.

Hoc unum itaque malorum, quod Dæmoniorum spiritus di-
stinguit ab humanis. An hoc solum? Addideto illi Vulnera, atque,
quæ ad mortem tendunt, grauia verbera. Quicunque spiritus ho-
rum causa sunt, produnt forsitan se non personaliter esse humanos;
sed dæmoniorum spiritus.

Nec opus multis est pro Assertionis huius confirmatione. Quæ
probant mortes & clades Dæmonibus authoribus fieri; probant
vulnera atque verbera ab ipsis proficiisci. Ad proprium hæc offi-
cium in nostris hisce infestationibus, pertinent dæmonum. A fine, qui
spiritibus humanis, in suis apparitionibus, & infestationibus pro-
positus est, sunt aliena.

Sic ingentia damna, quæ fortunis & bonis externis viuentium infe-
runtur, Dæmones indicant. Non ob dictas tantum rationes: verum
etiam propterea, quod persæpe hæc humanis viribus procurari
nequeant. Non tantæ vires humanis spiritibus, ut magna damna,
quæ quandoque per spiritus afferuntur, ipsis authoribus fiant.
Sæpe etiam quamvis leuia sint, iis tamen mediis & rationibus
procurantur, quæ in humanorum spirituum non sunt potestate,
ut sunt excitati venti, ignes, &c.

C A P.

DE LOCIS INFESTIS
CAP. XXX.

An ē ex quibus officijs, atq; obsequijs, quæ à Spiritibus quandoq; viuentibus præstantur, cognosci possit, qui Spiritus humani sint, ē qui Diabolici.

1.

Fficia, hoc loco, opera quædam Spirituum, quæ in as-
sumptis corporibus exhibit, vocamus: Hæc quamvis
varia sint, ad quatuor tamen præcipua genera reuocari
videntur: ut alia dicamus *otiosa*, alia *molesta*, alia *pernitiosa*,
alia *obsequiosa*. Prima illa nullum ad hominem respectum habent:
posteriora tria cum hominibus, & propter homines suscipiuntur.

2.

Otiosa dicuntur, non quia Spiritibus in ijs nullus finis proposi-
tus est: nam sine fine & ratione nihil agunt Spiritus; sed vel quia
propter se sola suscipiuntur, vel certè non hominum causa. In his
ponimus Ludos nocturnos spectrorum Aquilonarium, quorum
Olaus Magnus meminit lib. 3. cap. 11. Gent. Septent. *Molesta* sunt,
quæ vt quies hominum interturbetur; aut aliquid aduersum ipsi
patientur, à Spiritibus suscipiuntur; vel si non idcirco suscipiun-
tur, cum molestia tamē accipiuntur: qualia sunt excitati strepitus,
vellicatio aurium &c. *Pernitiosa* voco, quæ præter molestiam, quam
afferunt; etiam incommodant, nunc in fortunæ bonis, nunc in
bonis corporis. *Obsequiosa* sunt, quibus bonum aliquod mortalibus
affertur, aut humana seruitia præstantur.

3.

Discussimus *molesta*, atq; *pernitiosa*; & *vtrum*, atq; quod discri-
men inter humanos, atq; Dæmoniorum Spiritus constituant, no-
tauiimus: hoc capite, Vtrum etiam ex *obsequijs*, quæ mortalibus Spi-
ritus impendunt, discriminè aliquod capiatur, examinabimus.

4.

Nam quod *Obsequia* quædam Spiritus mortalibus præsent; dubium
non est. Experiuntur illa Magi pleriq; quos inter atq; Spiritus pacta
intercedunt. Experientur Sagæ; quando ad nefandos congressus,
& conuentus properantes, suis vtuntur Martinellis. Et nos pro
hoc argumento, non pauca protulimus Capite primo.

5.

Et ab *Omnis generis Spiritibus* hæc *obsequia* præstantur Purgan-
dus Spiritus Paschalisj cuiusdam obsequia præstabat In Thermis
Angularibus Germano Capuano Episcopo Diabolicus fuit Heil
desheimensis Hudeken; qui diligètem curam habuit commenda-
tæ sibi à marito vxoris. Damnatus videtur fuisse Apollonij Thia-
nei

æi Philosophi; qui capta ab Aureliano Imperatore vrbe Asiæ, Tyanz post mortem Imperatori apparuit, hisque verbis eundem est allacutus: *Aureliane, si cupis vincere, non est quod de ciuium meorum nece cogites. vide Cælium Rhodeg. lib. 17. capite 13.* qui hoc ex Fla. Voplico.

6.

Hæc cùm ita sint; immeritò quæritur, vtrum etiam ex his argumenta peti possint, & indicia; quibus deprehendatur discrimen humanorum & diabolicorum Spirituum. Alij forsitan crediderint his humanos, maximè purgandos, Spiritus cognosci, quod hæc obsequia humanitatis sint plena. Alij tribuerunt omnia Dæmonibus, quibus studium non paruum est etiam Angelicis obsequiis, mortalibus illudere. Nos quod probabile est, iudicamus quædam esse, quæ vehementes suspicione gignant, quod à Dæmonum, non hominum spiritibus proficiuntur: humanos spiritus vel nulla prodere, vel admodum leuiter insimulare.

7.

Primum Obsequiorum, quæ Dæmonum tantum videntur esse indicia, tria sunt genera. Quædam possumus dicere necessaria; quædam humanas vires superantia: quædam vehementer nefanda. Necessaria dico, in quibus Spiritus hominibus, quibus obsequia præstantur, ex voto aut pacto sunt obstricti. Vires humanas superantia, quæ nec viuorum hominum propriis viribus fieri possunt, nec à defunctorum Spiritus. Nefanda, in quibus apertius naturæ leges violatur.

8.

Obstringi homines aliquando ex pacto Spiritibus certum est. Exempla suppetunt plurima. Quid, quod qui maleficorum sunt authores, nisi se Spiritibus obstringant; in maleficorum album non admittantur? Atque ut his se se Spiritibus homines obstringunt; ita vicissim hominibus se obligant, & sua opera promittunt Dæmones. Hæc opera atque obsequia Dæmones prodere; & non alios Spiritus, partim inde recte videmur colligere; quod pacta non inter defunctorum Spiritus & viuentes homines; sed hos inter atque Dæmones, intercessisse, atque intercedere identidem legamus. partim ex illo, quod non idcirco rebus viuentium intersint defuncti, ut pacta cum hominibus ineant; & ex officio, certa obsequia hominibus præstent.

9.

Exhibitentur etiam à Spiritibus obsequia aliquando, quæ humanas vires excedunt. Nunc enim in hominum gratiam, atque pro ipsorum voluntate & imperio à Spiritibus ingentes transponuntur lapides: nunc amplæ & splendidæ subito construuntur machinæ: nunc per aëra rapiuntur homines &c. His vero cùm humana

R.

manæ

manæ vires pares non sint; cùm sint multò inferiores; quomodo
humanis Spiritibus authoribus hæc fieri credi debet?

10.

Denique nefanda Obsequia spiritus exhibent. Testantur hoc
qui ad mares sunt succubi; & ad fœminas incubi. Testantur idem
Iornandes Gothorum Episcopus, li. de Gothorum origine, VVil-
helmus Parisiensis & Thomas Brabantinus li. de vniuersali bono,
Vincentius lib. 21. cap. 30. Histo. Ioannes Nider lib 5. form. de Ma-
lefic. cap. 10. An hæc humani Spiritus exhibent? Non exhibent pur-
gandi, quos superius diximus, peccare non posse. Non exhibent
damnati, quod quæ in hoc nefando congressu necessaria sunt, per
illos non ita commodè fieri possint. A Dæmonibus igitur, vt cer-
tum est persæpe, & vt plurimum fieri; ita verisimile est à solis fieri.

11.

Gaudent autem hoc exercitio plurimū immundi Spiritus:
non ea causa, quod inde sobolem tollant; vel voluptatem aliquam
cipient, afferantur; sed propter hominum perniciem, quam im-
sè expetunt. Norunt enim naturam hominis pronissimam esse ad
voluptatem: Eam etiam illecebram esse cuiuslibet turpitudinis &
improbitatis, atque omnium malorum escam. Experti præterea
sunt viros quotānis prudētia, probitate & grauitate præditos, blā-
ditiis, voluptatum delinitos, sæpenumerò esse corruptos, & ad
magna tractos flagitia. Meminerunt etiam fortissimum omnium
mortaliū Samsonem, sapientissimumque Salomonem, etiam
sanctissimum Dauidem, voluptatis dulcedine inescatos, impuris-
simis flagitiis, & grauissimis calamitatibus contaminatos & attritos
esse. Nec ignorant vitium luxuriæ, quatuor rebus cætera vitia su-
perare; amplitudine, diuturnitate, sœcunditate & curationis diffi-
cilitate. Hæc enim habes latissimè diffusa est, atque omne propem-
dum genus hominum complexa: & quem semel corripuerit, sic
e tenaciter adhærescit, vt vix vniquam auelli queat. Denique viti-
um hoc inolitum, atque inueteratum in animis hominum, diffi-
cillimam habet curationem. Quid plura? voluptas corporis innu-
merabilium malorum, tum priuatim, tum publicè seminarium
est. Propter hanc non vnius tantum, aut paucorum hominum; sed
familiarum, ciuitatum, gentium, imperiorum, totius denique
orbis terrarum clades & exitia contigerunt. Hæc non ignorant
Dæmones.

12.

Hæc obsequia Dæmonum sunt argumenta. An his contraria sunt hu-
manorum Spirituum? libera dico, humanis viribus? paria? honesta?
Possunt talia ab humanis Spiritibus esse: at à solis non sunt. A Dæ-
monibus, vt necessaria; ita libera; vt humanas vires superatia; ita
humani.

humanis viribus paria: ut nefanda; ita honesta possunt exhiberi.

Nullumne igitur indicium in Obsequiis, quod humanis tantum Spiritibus conueniat? Si aliquod est, illud crederem esse; quod, praeterquam liberum esset, & viribus hominum par, & honestum; etiam cum quadam animi submissione significazione offertur, & omnisi suspicione peccati caret. quod quare ratione bene dicatur, docent que de Oratione dicuntur cap. 28.

CAP. XXXI.

*In ex otiosis officiis Spirituum, possit deprehendi,
qui sunt humani, & qui Dæmoniorum
Spiritus?*

Hec Officia Spirituum quadruplicia, discussi us molesta, pernitsiosa, & obsequiosa: & quid ad ipsorum distinctionem aciant, demonstrauimus. Una restant *Otiosa*, quæ ne prætermissa videantur, hoc Capite examinanda sunt: & eod breuius, quod ex dictis de hisce iudicium haud difficulter fieri possit.

Quæ ipsorum conditio sit, clarum est. Non hominum propriæ causa à Spiritibus suscipiuntur, sed propter se, & causa sui. In hoc genere præcipue choreas ponimus atq; lusus, ludicrasq; quasdam gesticulationes, & quæ cum his similitudinem atq; affinitatem habent.

Hæc aliquando à Spiritibus fieri dubium non est. Nam vt de iis nihil dicamus, quæ in conuentibus nocturnis Spiritus, cum perdite salutis hominibus habent; refert Olaus Magnus, apud Aquilonares populos solere nocturnos viatores, & armentorum custodes, mirificum concentum Spirituum obseruare & ludum, illumque incolas vocare choreas Eluarum, de his nos I cap.

Sed humarōne Spiritus à Dæmonibus hæc officia distinguunt? Omnino quis id existimauerit, qui horum officiorum, atq; ipsorum Spirituum conditiones inter se comparare voluerint. Cum enim officia hæc lætitiae sint argumenta, illis tantum spiritibus tribuet, qui gaudiorum possunt esse participes; quales sunt humani purgandi: ab illis remouebit, in quos gaudium nullū, nulla veluptas cadere potest; quales præcipue sunt ipsi Dæmones.

Quid enim h̄ dubiū? An quod hæc officia lætitiae sint argumenta? An quod gaudiorum sint participes Spiritus purgādi? An quod in malos, præsertim dæmones, gaudia non cadant? Certa & clara sunt omnia.

R 2

Quod

6. Quod l^etitiæ argumenta & indicia sunt communis omnium habet sensus, & consensus. Omnes ex his animorum l^etitiam in aliis colligunt. Omnes si hæc prætent, l^etitiæ suæ interioris argumenta se dedisse existimant.
7. Quod gaudiorum participes sint purgandi spiritus hinc colligitur, quod molestiarum, quas sultinent, finis sit æternæ virtutis infinita voluptas. Sed & illius ipsius voluptatis expectatio, quæ apud ipsos certissima est, gaudium præsens illis affert. Et omnino credendum est eosdem recreari viuorum, quæ ipsis offeruntur, precibus & suffragiis.
8. Et hi volupratem capere possunt, & capiunt; ita omnis voluptatis & gaudi expertes sunt Dæmoniorum spiritus. Non possunt ullæ tristitia affici beati, qui cum Christo regnant in cœlo. Non possunt ullam l^etitiam capere damnavi, qui à cœlo excisi, infernalibus tormentis suppliciis. Tantus est damnatorum dolor & tristitia, ut si qua esse posset in iis, mox absorberetur voluptas. Tanta Dei iustitia vindicantis impiorum in inferno peccatum, ut ne concurrere velit cum iis ad ullū, quo voluptatis participes esse possunt, atque, ut pulchre philosophatur noster Ludouicus Molina in 1. parte S. Thomæ. Quod si B. Augustinus aliquando docet, l^etari ipsis de infelici sua potestate; non intelligendus est, ipsis aliquam voluptatem concedere; sed solum insinuare hanc ipsis potestatem placere.
9. Sed tamen officia hæc otiosa, quæ diximus, bonorum spirituum, propria non sunt. Quid, quod nec quidem illis tribuenda? Quid, quod sunt solorum malorum? Et hæc tria breuiter pro instituti ratione doceamus.
10. Primum experientia docet, in iis spiritibus, quos superius Guteolos diximus vocari à Germanis. Hos leuiter esse petulantem mimicas quasi actiones exercere deprehēsum est sepius. Quis vero dubitauerit de genere malorum spirituum esse Cytharenum, qui in mediis vndis ludens conspicitur haud procul à Finlandiæ arce: cuius meminit Olaus Magnus lib. 20. cap. 19.
11. Sed nec officia hæc sunt tribuenda bonis spiritibus, qui purgatoris ignibus expiantur. Quamuis enim voluptatis & gaudiorum sint capacities; ut tamen exterius l^etitiæ signa dent nulla causa est, quæ urget. Ut porrò dent leuitatis atque petulantiae, sine quibus officia hæc non exercentur, quis crediderit? præsertim eos spiritus dare quos aliquoties dictum est peccare non posse?
12. Solorum igitur malorum spirituum hæc officia sunt: qui quamvis l^etari & gaudere reuera nequeant; l^etitiam tamen & gaudium possunt

possunt simulare & fingere: Spiritus ad quascunque res fingen-das aptissimi.

An verò malis vtrisq; communia? hominum scilicet damnato-rum Spiritibus & Dæmonū? Difficile est hoc definire. Verisimile est aut esse propria Dæmonum, aut ad hec cogi Spiritus hominū: vt habeant cōmūnia miseri, cum Nequā Spiritibus officia, cum quibus com-munem habent infelicem conditionem.

Quid ex dictis omnibus? Hoc solum. Admodum probabile
esse, discriminē aliquod ex his officiis peti; quod humanos Spiritus
à Dæmonibus discernat, cū officia hæc non nisi Dæmonibus conueniant.

Et profecto Dæmones à mimicis gesticationibus et leuio-ribus actionibus non abhorre, primū quidam illi probant, qui Verretensis monasterii virginibus molesti fuerunt, de quibus The-
si 19. capituli primi: tum is, qui in forma simiæ infinitos iocos Sanct. Dominico exhibuit, de quo in vita eiusdem li. 3. cap. 7. Theodori-
cus de Apoldia: ut nihil de iis dicamus, qui Dæmoniacos obsidet.

C A P. XXXII.

An ex locis sacris & profanis: desertis & cultis
possint distingui humani Spiritus à Dæ-
monibus, si quando dicta loca infesta
sunt.

Lorum differentiæ admodum sunt variæ. Res per se
clara est. Nos illas solùm scrutabimur, quæ instituto no-
stro seruiunt. Hæ duplices sunt generis: quædam ex lo-
corum petuntur qualitatibus: quædam ex rebus, quæ in
locis acciderunt. Ratione priorum dupliciter distinguuntur; in
Sacra, & profana: deinde in Culta siue habitata; & deserta, siue ho-
minum usib; non seruentia. Ratione posteriorum alia sunt fla-
gitio siue peccato; alia morte alicuius insignia: alia verò, in quibus
horum neutrum notatur.

Horum locorum in Spirituum molestiis atque infestationi-
bus rationem aliquam haberi dubium non est. Nam & quibusdam
frequentius obseruantur Spiritus, quæ præ cæteris affectare viden-
tur: quædam, contrà fugiant & detestantur. Affectione quidam loca
deserta: fugiunt alia alij: vt illi, qui præcedente nocte, antequam
Basilica S. Petri Coloniæ consecraretur, auditæ sunt horrendis vo-
cibus clamare, quod sedibus suis pellerentur, quemadmodum an-
no 871, notauit Sigebertus.

R. 3

Quia

2.

3. Quia verò non verisimile est, quosuis Spiritus quibusuis locis delectari; nec quosuis quævis loca fugere & declinare omnino ex locis de conditione Spirituum cōiectura peti posse videtur. Quanta verò, & qualis? Id hoc capite ostendendum in ijs locis, quæ qualitatibus distingui diximus. alia sequenti Capiti referuamus.
4. Duplicia igitur hīc loca ingredienda sunt: primū sacra, & profana: tum deinde deserta, & culta, siue hominum vībus seruientia.
5. In profanis laboreatq; inuestigatione magna opus non est. Certum est ex his Spiritus non distingui: quod his, & Dæmonum, & hominum, tam damnatorum, quām purgandorum Spiritus reperti sint, & reperiantur. Exempla suppeditat primum disputationis præsentis Caput. Nec aliud suadet ratio: quoniam quod Spiritus quoscunq; profanis locis prohibeat est nihil: quod quicunq; illis locis inueniantur, rationes sunt & multæ & magnæ.
6. A Sacris fortè quis excluderit malos. & ob id, quamuis hīc non vniuersè Dæmoniacos ab humanis; à quibusdam tamen (purgandis videlicet) distinguet. Sed alius forsitan, ad *sacra loca*, præter purgandos, admiserit malos damnatorum hominum Spiritus; exemplo persuasus Doctoris Parisiensis, qui horrendis vocibus, se & accusatum, & iudicatum, & damnatum, in Templo proclamauit. de quo in vita S. Brunonis. Fortè sunt, qui nec Dæmones velint *sacri loci*, & *templis* exclusos: propterea quod in templis sæpe inueniantur à Dæmonibus obsessi Dæmoniaci: & tumultus nocturni, prænuncijs mortis (quos à Dæmonibus, vt plurimum excitari, alias diximus) in templis audiantur frequenter: oratur etiam in templis, primum se aqua lustrali aspergant, ne Dæmonis temptationibus impediatur. Sed & honines quidam persequentes patiuntur Dæmones: quid si ad tempora hi conueniant? ibi commorentr? eruntne mox à Dæmonum molestia liberi?
7. Difficilem hæc faciunt, ad propositam questionem, responsionem. Interim tamen non errare dixerim eos qui ex sacris locis discrimen aliquod peti posse crediderint. *Templi*, vt plurimum, excluserint Dæmones: humanos verò Spiritus (vtrum omnes, an aliquos, postea discutietur) ad illa admiserint. vt ob id, qui in sacris locis molestare viuentes, aut infestare obseruantur; habeantur, vt plurimum, non Diaboli & Dæmones; sed defunctorum hominum Spiritus & animæ.
8. Recepta est apud Catholicos consuetudo, nec frustra; vt si quæ loca Dæmonibus infesta sint; illa exorcismis atque orationibus Ecclesiæ

Ecclesiæ liberentur & purgentur. Quid igitur in locis *sacris*, templis, atq; oratorijs, quæ exorcismis atq; orationibus & purgata, & Deo consecrata sunt, infestantes Dæmones quærimus? Ante quam diuinis vīsib⁹ loca consecrentur, authoritate, diuinitus Ecclesiæ relicta, ab ijsdem Dæmones proscriptentur; & postquam iam consecrata erunt, domicilia erunt Dæmonum? illa pro sua libidine poterunt infestare? poterunt in ijs mortalibus molesti esse? clades atque detrimenta afferre?

Quām sunt multa in templis, consecratisq; locis, quæ Nequam Spiritus, cane peius & angue, oderunt? Sanctorum Imagines. Sanctorum Reliquiæ vasa sacra? res sacræ, quarū vsus in Sacramentorum administratione? pietatis exercitia? Christi sanctissimum sub speciebus panis corpus.

Nec repugnant assertioni huic, quæ superius allata sunt argumenta. Aut enim ostendunt vi, & quasi inuitos cogi ad loca sacra Spiritus Dæmoniorum: aut propriè non reddere infesta loca: aut non molestos esse excitatis tumultibus; sed mentem tantum, ne Deo in oratione, quemadmodum par est, coniungatur, distrahere.

Vnum fortè, quod dicebatur in facris locis inueniri posse homines, qui persequentes patiuntur Dæmones, aliquid roboris habere videretur; vt horum ratione credi possit sacra loca à Dæmonibus infesta redi. sed hoc tantum abest, vt assertionem infringat; vt etiam magis confirmet. Certis enim, & propria experientia edictis testibus didicimus eos, qui talium Spirituū molestias sustinuerunt, cum alijs locis nullis tuti essent, sacris tutos fuisse.

Atq; ita se rem habere existimamus vt plurimum; vt humani; non Dæmonum sint prius, qui sacris locis obseruantur. Contingere nihilominus, sed rarius potest, vt his etiam molesti sint Dæmones. Pro quo duo nobis suppeditat exempla Cæsar Baronius, Tom. 5. & 6. Historiæ Ecclesiastice. Vnum sub annum Domini 415. refert accidisse in Ecclesia quadam Alexandrina, quæ olim famosissimum idolifanum fuit; quamuis enim hæc Christo à Theophilo Alexandrino consecrata esset; infestationes tamen Dæmonum sustinuisse, donec in eandem illatæ sunt Reliquiæ S. Marci Euangelistæ; Cyri atq; Iohannis, docent acta eorundem Martyrum, in posteriori Niceno Concilio cognita & a S. Ioanne Damasceno comprobata hoc Tom 5. Alterum sub annum Domini 471. accidit Gennadio Constantiopolitano Episcopo ante ipsius obitum. Cùm ille nō tu ad altare sacrificij orans astaret, & preces ad Deum funderet; Spectrū dæmoniacum ei apparuit; quod ille protinus signo crucis, veluti immiso

DE LOCIS INFESTIS

136 immisso telo fugavit, cumque recederet, haec est humana voce locutum: abeo, & te viuente quiescam: reuersurus post obitum tuum, & modis omnibus euersurus Ecclesiam. Hoc Tom. 6. ex Theodoro Lectore, Collect. lib. 1. & Nicephoro lib. 15. cap. 23. Duobus his tertium adiungimus, ex vita s. Domini lib. 3. cap. 12. desumptum. Mandauerat vir Sanctus suis; ne post ultimum campana datum signum in Templo haberent. Mansit tunc Monachi formam indutus Diabolus, ut præceptum viri sancti transgrediendo, ab eodem tanquam immorigeruſ frater reprehenderetur; silentiisq; leges, quas summa cum religione vir Sanctus colebat, violaret. Nec Spes fecelit Nequam Spiritum. reprehensus enim mox subrisit, & silentij leges violatas Dominico obiecit.

138 Atque haec de sacris locis. An quoque locis desertis & cultis humani atque Dæmoniaci Spiritus distinguuntur? Probabile id admodum est. Verisimile prorsus est, qui desertis locis & ab hominum usibus alienis tumultuum & turbarum sunt authores, Dæmones esse; non humanos Spiritus.

14. Huius haec argumenta sunt; quod & qui similibus locis infesti fuerunt, pro Dæmonibus habiti sint; & multis inde iis se Dæmones esse insinuarint: & præterea nulla ratio sit, ob quam iis locis humanos Spiritus vagari atque degere credi debeant.

15. Pro Dæmonibus habiti sunt, quicunque in vastissima eremo molesti fuerunt Antonio, atque Paulo, primis eremici cultoribus; quorum B. Hieronymus meminit. quicunque in eadem eremo noctis quietem interturbarunt Monachi; quorum studium atque piatem commendat Cassianus. quicunque in fodinis metallicis reperti sunt, &c. de quibus nos superius.

16. Sed & certis induijs se probant Spiritus Dæmoniorum esse, qui dictis locis obseruati fuerunt. alias peregrina forma: ut qui Antonio factus est obuiam, fronte cornibus asperata alius morum & gestuum leuitate; ut cythareodus in extremis finibus Finlandiae, alias morte & nece hominibus allata; ut Spiritus Annebergicus. alias simulato brutorum animalium clamore; ut qui vel leonis rugitum, vel serpentum sibilum, vel taurorum mugitum aliquando edidit, &c.

17. Huc accedit, quod Raphæl Angelus apprehensum Dæmonium religauerit in deserto superioris Egypti, tanquam loco sibi conuenienti, Job. 8. Et quod Dominus doceat electos Spiritus ambulare per loca arida, ibidemq; requiem querere, & non inuenire. Haec scilicet deserta sunt loca, quæ Dæmonibus arida dicuntur & in-

R. 3

quieta

quieta, quod in ipsis materia hominum generi incommodandi, quā semper expetunt, non suppeditetur. Ita Abūensis in II. Matth.

Cur etiam desertis locis versarentur humani Spiritus? An ut his pœnas peccatis debitas persoluant? At ad hoc ipsis seruiunt purgatoria atque infernalia loca. An, ut diuinæ iustitiae dent testimonium, illis ipsis, quos sustinent, cruciatibus? At hæc hominibus, qui iisdem iuuari possunt, non lapidibus atque arboribus; non feris atque brutis animalibus, quæ locis desertis reperiuntur, sunt exhibenda. An, ut subsidia atque patrocinia obtineant viuentium, & ipsorum opera inueniuntur? At hæc in cultis locis, & vbi homines inueniuntur, expectari debent.

Omnino viuentū causa defunctorum Spiritus ad viuos redire videntur: siue rationes ex parte Spirituum; siue ex parte Dei; cuius voluntate & dispensatione fit, vt reuertantur, petantur. Omnino igitur necesse est, vt vbi viuentes commorantur, versentur: locis cultis, & hominum usibus seruientibus; non in cultis, & ab hominum consuetudine alienis.

C A P. XXXII.

An ex locis morte alicuius, aut egregio facinore notatis, possint humani & Dæmonum Spiritus distingui: Et quomodo.

Lestratis locis sacris, & cultis; illa iam sunt percurrenta, quæ vel aliqua morte, vel graui facinore notata sunt. Circumspiciendum, Vtrum ex iis diiudicari possit, quæ conditio Spirituum, iis locis oberrantium: an, scilicet,

humani sint, an Dæmoniorum.

Nam hæc, præ ceteris locis Spectris & Spiritibus infesta esse promedium nullus est, qui ignorat. Et si exemplis agendum est, non desunt hæc, tam in locis, quæ ob alicuius mortem nota sunt; quam, vbi grauia commissa criminis. Pro prioribus, vt alia omittam, est spiritus, qui domum infestauit, vbi Cæsar Caligula imperfectus est. Pro posterioribus, quod Cardanus lib. 16. cap. 93. de Rerum varietate, his verbis refert. Est inquit, familia nobilis, ac inter primas Parma, Torrellorum nuncupata. Possident arcem, in qua aula est. In ea, sub camino, solet rideri anus iam centū annis, quoties ex familia aliquis obiturus est. Referunt hauc annum olim suisse prædictum, & ob pecunias imperfectam à nepotibus suis, & in frusta diuisam, proiectamq; in latrinam. Ita Cardanus.

Et non solum his locis Spiritus apparere, & molestos esse: ve-

rum

rūm etiam ob peractam mortem, aut commissa scelera, molestos esse credendum est. Cuius hoc haud leue argumentum est; quod ante peractam mortem, commissaque scelerā, iis locis nullæ Spirituum molestiae perciperentur; posthac illæ mox securæ sint, & obseruantur.

4. De his igitur quæstio est. An humanos spiritus à Dæmonibus distinguantur, ut quicunque his locis obseruantur, vel hominum sint spiritus, vel Dæmoniorum: an non distinguantur; ut utrisque promissuè possint reperiri, & reperiantur omnis generis spiritus.

5. Et, ut de prioribus primum dicatur, verisimile admodum est aut humanos esse, qui iis locis versantur, ubi aliquem mori & ex hac vita discedere contigit: aut profecto sub humana specie Dæmones, illos homines, qui iis locis usurpari huius vitæ eliquerunt exhibere.

6. Habet hoc quidem primum communis omnium sensus: sed maximè probant quæ in his spiritibus obseruantur, conditiones in primis autem rationes, quæ pro humanis potius, quam Dæmoniorum Spiritibus militant.

7. Diximus, superius, humanos spiritus forma deprehendi humana: & qui his locis versantur, non forma humana tantum deprehenduntur, sed eandem plerumque referunt, quæ hominum fuit, qui dictis locis vitam cum morte commutárint. Diximus humanos deprehendi ex gemitu & suspiriis: & hi spiritus, vel gemitu & suspiriis testatur suas miseras, vel certè nullos barbaros sonos edunt. Diximus levitatis argumenta ab humanis esse aliena: apud hos spiritus nulla ex iis obseruantur. Diximus grauia quandoque detrimenta à Dæmoniorum, non hominum spiritibus afferri: quando vero auditum ab his spiritibus grauia damna allata esse.

8. Cum hæc loca, post mortem solum infesta sint; ante mortem verò nequaquam; quid est, quod post mortem illa à Dæmonibus infestari dici debet, quæ antequam mors accideret, nullas Dæmonum sustinuere molestias? An fortè mors hoc secum affert, ut Dæmonibus locum patefaciat? Quis hoc credat? An non mortis; sed perditorum hominum mores Dæmones assilient? At non nos perdite vitæ morientium, sed solius mortis rationem habemus. An Dæmones fortè his locis, mortuos apud viuos cupiunt traducere; ut non felicium, sed miserorum loco habeantur? At hac ratione ipsi tibi Dæmones erunt contrarii; propterea, quod his apparitionibus & Spirituum molestiis primum excitentur viuentium studia, ut defunctis bene velint & faciant; tum deinde ipsi defuncti (nisi quidem ipsorum conditio proflua desperata non est) viuentium.

rum iuuentur pietate & charitate: quæ utraque Dæmonibus vehementer displaceant.

Omnino ad hæc loca, præ cæteris, humani spiritus, si non omnes, aliqui certe redire desiderare posse videntur. Cum enim illorum quidam idcirco potissimum redeant, ut humanis subiudiis iuuentur; ubi lubentius versari credendi sunt, quæcum vbi præstitiones sunt re media? ubi verò præsentiora; quæcum vbi omnium fere opinionem, humani spiritus versantur? ubi in scuntur qui obrerant? ubi defunctorum, qui bene defunctis volunt, pl. runque amici.

Et ita de prioribus locis sit definitum. De posterioribus non simplex danda responcio. quoniam loca hæc, quæ ob crimina & peccata, maculam quandam contraxerunt, vel habent criminum & peccatorum suos superstites authores; aut vita illi sunt defuncti. si vita funeti sunt, probabile iis locis ipsorum spiritus versari, vel Dæmones. Si superstites adhuc sunt, dubium non est, quin Dæmonibus, non autem humanis spiritibus infelta sint loca. Quatuor asservimus quatuor sunt demonstranda. Ab ultimo incipimus.

Primum humanos viventium spiritus non posse molestos esse ijs locis, quæ ob viuentium adhuc sceleris horrora sunt, extra omnem est controversiam. An hi possunt aliis esse locis, quam sua, quæ fouent & sustentant, sunt corpora? Sed quia pro hoc argumento alias plura dicta sunt, hic pluribus opus non est. Vide librum nostrum de prodigiosis virorum apparit.

Quod verò sint Dæmonam spiritus, quiuis hinc facile intulerit. Sed quam sit hoc conueniens, qui non statim omnes percipiunt, hic docemus. Et principio quidem ea est peccatorum fecunditas; ut non homines tantum summis miseriis, & Dæmonum vexationi inuoluat; verum etiam loca, ubi ipsa perpetrantur, diuinæ iræ & Dæmonum potestati subiecta. Deinde recitantur his locis Spiritus Nequam, partim quia his Deus grauiter est sensus; partim quia iisdem ipsorum regno facta est accessio sed & Deus haec loca Dæmonum infestationi exposita esse, potest videri velle, ut etiam hinc grauitatem peccatorum mortales intelligant, nouissima præuideant, & de salute sua cogitent.

Vix defunctorum spiritus ijs ten locu versari, ubi grauia crimina perpetratur viuentes: primùm probant exempla eorum, qui levia peccata illis ipsis locis, ubi commissa sunt, post mortem, dignis penitentia fructibus, expiatunt. Deinde illi, qui iisdem ob

DE LOCIS INFESTIS

grauia, puniti leguntur. Vtraque primum Caput suppeditat. Dei etiam bonitas atque iustitia hanc rem reddit admodum probabilem. Bonitas erga viuentes demonstratur; qui miserorum Spirituum exemplo possunt, si volunt, fieri meliores. Iustitia erga ipsos defunctorum Spiritus; ut hi intelligent ex omnibus iis rebus suppliciorum suorum acerbitatem crescere, quæ ipsis quouis modo dum peccarūt, seruierunt.

4. An verò soli sunt defunctorum Spiritus, qui locis, vbi peccata perpetrata sunt, obseruantur? Admodum hoc probabile: veruntamen, ut videtur, non necessarium. Probabilitatis argumenta, in priori huius Capitis parte, clara sunt. At ut soli molesti sint, infesta que loca reddant, necesse non est; quemadmodum thesi secunda, ante hanc, euinci potest.

CAP XXXIII.

An, & quomodo ex Catholicorum hominum, & infidelium locis, possit colligi Spiritus, qui molestant, esse humanos, vel Diabolicos.

2. Ræter iam dictas, & peruestigatas, locorum differentias, alia est, quæ ex personis, loca incolentibus, accipitur: ut scilicet, quædam dicantur Catholicorum habitacula; quædam Non Catholicorum, sive infidelium. Nam cum homines omnes aut fideles sint, sive Catholici; aut infideles, sive Non Catholici; certisq; locis cōmorentur; ipsa ab his incolis loca non incongruè accipiunt appellationem.

3. Infidelium autem, sive Non Catholicorum, non vnius generis loca sunt omnia. Nec mirum. Non vnius generis infideles sunt omnes. Sunt Pagani. Sunt Iudei. Sunt Hæretici. Et loca igitur alia Paganorum, vbi Pagani; alia Iudeorum, vbi Iudei; alia Hæreticorum, vbi Hæretici commorantur.

4. Omnia hæc loca disputando percurrere possemus. Quidni facimus? Quia non opus. Nostris sumus contenti: Hæreticis, & Catholicis. Sua examinent Pagani: sua Iudei. Quid nobis de his, quæ forsunt iudicare?

- Posset forsitan videri frustra hæc suscipi inquisitio: quod Hæreticorum ab omni Spirituum infestatione liberrima dicantur; & ob id his locis spiritus distingui non possint; sed quia Catholicum loca infesta sunt; propter hos omitti nō debuit. Quid, quod nec Hæretico

Hæretorum loca satis sunt libera? Possemus hoc exemplis docere: verum, quia proferri hæc nequeunt, nisi & loca spiritibus infesta proderemus, & homines Hæreticos accusaremus; omissis exemplis ratione agamus.

Quærimus quidnam Hæretorum locis spiritus prohibeat? An Hæreticos spiritus refugiunt? & refugiunt spiritus quicunq; hominum? Dæmoniorum? Quis hæc credat? quis dicat? quis profiteatur? quam magna consuetudo Hæretorum magistris, cum certo quodam spirituum genere, quorum in locorum infestatione præcipuum studium? vide caput vigesimum primum Disputationis de Dæmoniacis.

Gentiles atque Iudæos pati spirituum infestationes manifestum est. quid Hæreticos excipiet, qui in eadem, cum cæteris infidelibus, sunt classe & damnatione?

Vel sanctitas doctrinæ, quam Hæretici profitentur, meretur, ut à spiritibus non impeti debeant, vt quidam dicunt: vel probitas vitæ, quam agunt: vel singulare quoddam, quo Deus vult ipsos his exemptos, priuilegium. Quid horum? aut quid aliud? Non doctrinæ sanctitas. Impiissima illa est Christi, Apostolorum, & totius antiquitatis doctrinæ aduersa. Non probitas vitæ. Nunquam enim impiæ doctrina vera vitæ probitas consistit. Non priuilegiū, quia quando, quare, quibus præsentibus, vbi, quo authore concessum sit doceri non potest. Quid verò aliud?

Certum ergo sit loca Catholicorum spiritus infestantes perpeti. Constitutum quoque sit, non immunia esse Hæretorum. Quæramus igitur, Num ex his locis spiritus distinguantur.

Distinctio verò queritur, inter humanos spiritus, atque Dæmoniorum. Num ex iisdem locis conditio & distinctio humanorum inter se, colligatur, postea erit discutiendum. Quid igitur? Suntne omnes, qui Catholicos persequuntur, aut insequuntur, Dæmoniorum spiritus? qui Hæreticos spiritus humani? An contra, Omnes qui Catholicis molesti sunt, humani? qui Hæreticis, Dæmoniorum? An utrique inueniuntur apud utrosque?

Primum, Non omnes, qui Catholicos molestant, Dæmoniaci sunt, ipsos etiam molestant spiritus humani. Catholici fuerunt Germanus Episcopus Capuanus, cui se aliquoties exhibuit spiritus Paschafij Presbyter, cuius meminit Beatus Gregorius, cui fidele obsequium præstitit spiritus in balneis. VVormatiensium item accolæ, qui aliquamdiu sustinuerunt multitudinem spirituum,

armatorum equitum & peditum. Et exemplis quid opus? possunt meriti esse Catholici; ut spectris damnatorum hominum molestetur. possunt ab iisdem subsidia expectare & petere animæ fidelium defunctorum; quæ ex hac vita piæ, sed nondum satis purgatae discesserunt.

11. Nec soli humani spiritus Catholicis molesti sunt. sunt ijdem etiam Demones molesti. Quot molestias à Dæmonibus sustinerunt et mi cultores? de quibus cap. 26. quot alij Sancti viri? ut præstitia praetereamus? An fortè fidei sanctitas, quam Catholici profitantur, à Dæmonum insidijs reddit immunes? Non reddit. Minoribus sæpe insultibus suos exponit. An vitæ probitas? hæc sæpe apud Catholicos desideratur. deinde si quando adest, studium nocendi Dænum excitat. An signa sacra, quæ in Christianorum sunt animis? Hæc non desunt Hæreticis, non desunt damnatis.

12. Deniq; Nec omnes, qui Hæreticos infestant, aut Dæmonum sunt spiritus aut humani: sed nunc Dæmonum non humani. Ostendimus, prius ipsius capituli, à Spirituum infestationibus immunes non esse Hæreticos: quod vero nunc infesti sint Dæmoniorum spiritus. illæ ipsæ rationes confirmant, quibus ibidem vñi sumus: nunc vero hominum damnatorum: persuaderet societas; idemq; nocendi studium cum Dæmonibus, & his similia. Libet pro vtroq; exemplum adscribere ex Cæsare Baronio Tom. 6. circa annum Domini 513. Et quod Hæreticum damnati hominis spiritus terruerit, atq; molestari, docet exemplum Iohanni, sectatoris Serueti, autoris hæresis, quæ Acephalorum dicta est. huic is, qui coram Pontifici e Caypha, Domino alapam impegit apparuit atq; cundem, ut sceleris; ita suppliciorum locum futurum significauit. (Vide. Cap. 38. Thelini 8.) Quod vero nec à Dæmonibus sint tuti, docet per Ducem quendam Palæstinum, & qui ipius Seuerianus, qui cum Dominicum monumentum piætatis studio intrare vellet, aliquantes ab ariete (Dæmonis erat in forma arietis) repulsus est: nec post confessi nem quidem peccatorum, quibus se ab ingressa prohiberi existimabat, permisus est intrare: ledum demum admissus est, cessavitq; cornu per aries, ubi abiurata hæresi communione catholica le protestatus est esse Catholicum. Hac Baronius. Prius ex 36. cap. Prati Spiritu lis, posterius ex cap. 9 eiusdem Prati.

13. Maneat igitur vtrsq; & Catholicos & Hæreticos, Spirituum molestij essent expolites. Maneat vtrsq;, & ab hominum, & à Dæmonijs. a spiritibus molestias pati. Interamus ex vtroq; loca Ha-
relics

reica atq; Catholica Spiritus humanos à Dæmonibus non distinguere.

CAP. XXXV.

An, & ex quibus temporibus humani & Dæmonum Spiritus distinguantur, illi, qui rebus viuentium quandoq; intersunt.

Etiam Ria sacerdoti sunt in tempore, ex quibus, si quæ est, distinctio nter humanos & Diabolicos Spiritus sumi debet. substantia, quantitas, qualitas. substantia temporis die & nocte continetur. quantitas in diuturnitate & breuitate cernitur. qualitas in sacris & profanis diebus.

Omnium harum differentiarum rationem habendam esse, in cognoscendis spiritibus, inde videtur certum; quod ipsarum rationem etiam Spiritus habeant de diebus & noctibus alijs dictū est. Aliquos etiam nō diu esse molestos, docet experientia: alij contra sunt, qui diuturnitate molestiarum etiam suos dominos propriis sedibus & domibus pellunt. Præterea, quia tempora apud Christianos vel sacra sunt vel profana; hoc ipso clarum est, his vel istis temporibus Spiritus esse molestos, quo clarum est esse molestos.

Quid autem? substantia, quantitas, & qualitas temporis, distinguuntne humanos Spiritus à Dæmonibus? Nos, quia triplices temporum differentias distinximus, tribus Assertionibus, quantum consequi conieciura licet, quod res esse videtur, concludimus.

Prima esto. Noctes & dies humanos atq; Dæmoniorum Spiritus non distinguunt. Non necesse est, illos Spiritus Dæmoniorum dicamus, qui noctibus sunt; molesti: illos hominum qui interdiu. Noctibus sunt molesti Dæmonum, & hominum Spiritus: diebus, & clara luce, sunt molesti Dæmonum & hominum Spiritus.

Quod dicitur. clarum est exemplis, omnis generis, Spirituum. Nec assertioni contradicit ratio. Quemadmodum non ad locum; ita non ad tempus astricti sunt Spiritus. Vtraq; extra ipsos: vtraque ipsis nō attingunt. Nec luce diei indigent ut videat, quo videntur: neccaligine noctis iuvantur, quod operationes valent exercere.

Sunt hæc certa. Luce tamen amantiores sunt; & per se appetentiores humani spiritus; si non omnes, certè purgāti: tenebrarum & noctis Dæmoniaci. Quid mirum? qui malè agunt odiunt lucem: Domini sententia est Ioan. 3. Et si econtrariò licet argumentari. Cùm malè non aget purgandi spiritus; non oderint lucem: In luce igitur versabuntur; quemadmodum & versati sunt in balneis illi, quorum minit B. Gregorius, & nos i. cap..

7. Est aliud pro hanc reargumentum, quod Regius Propheta signifiet eum, *Qui habitat in adiutorio altissimi, non habere sibi timore etiam a Dæmonio meridiano:* quo insinuat Dæmones plerosque noctibus esse molestos, & quasi lucem solis vereri; quosdam tamen admodum audaces; qui, quam cæteri, lucem non refugiant; & interdiu etiam homines adoriantur. Ita locum Prophetæ exponunt Thalmudici, R. Salomon, & Chaldæus cum nostris, inquit Genbrardus in Psalmos.

8. Secunda Assertio. *Negat diurnitas molestiarum, quæ a spiritibus afferiuntur; neque breuitas; certorum spirituum certum est indubitatum est argumentum.* Si est, quæso quanta? quorum? Diutissimè molesti fuerunt Spiritus Dæmoniorum, in fodinis metallicis; quorum primo Capite meminimus. & ad centum & plures annos molestia fuit vetula, in arce Tarellorum Parmenium. Quid vero? qui longo tempore molesti esse potuerunt; non poterunt breui? breuiores? breuissimo?

9. Nihilominus, si diuturniores fuerint molestiae, & hominum aliquot ætas superent; admodum est verisimile, carum authores esse Dæmones; rarius defundatorum hominum, maximè damnatorum. Illius rationem dixerim ex fine colligi, qui ipsis propositus est unus; ut semper noceant, quibuscumque etiam mortalibus; huius, quod ea lege ad viuos redire permittantur hi damnati; ut iustitiae diuinæ, sua miseria, dent testimonium: quod non ita commode præstant, nisi eorum se aspectibus, quibus noti sunt, obijciant; ut idcirco credi possit, non diutius ipsos molestare, quam horum ætas permittat.

10. Tertia Assertio sit. *Nec sacra, nec profana tempora sibi, tanquam propria, usurpare Spiritus Dæmoniorum.* Nam & sacris possunt adesse humani, & profanis Affectant Dæmones sacra, ut profanent: affectant eadem humani Spiritus (purgandi) ut facilius viuentium auxiliis iuuentur. Quærunt illi profana, tanquam sibi magis convenientia: eadem satishumanis (purgandis) convenientia sunt, si subsidium præstant.

11. Non eadem ratio temporum, & locorum est; ut quemadmodum per se sacra loca fugiunt Dæmones; ita sacra fugiant tempora. Alia longè est conditio locorum consecratorum; alia temporum. Sunt loca sacra consecratione summorum Pontificum; & Ecclesiæ sacræ orationibus, illa Dæmonibus interdicuntur. Sunt tempora sacra; veruntamen nulla consecratione; nullis exorcisis: sola Dei atque hominum voluntate.

Forte

Forte tamen, quia non solum res sacras; sed & signa rerum sacrarum Dæmones detestantur; & quicquid demum *sacrum* redollet; sacris temporibus, tanquam non suis: sed profanis, tanquam magis conuenientibus, insolentiores & molestiores erunt: & nisi aliunde molestandi occasiones habeant, sacris se continebunt, minusque molesti erunt. Sed ut hoc cum ratione dicitur: ita cum ratione potest negari.

Quid porrò ex dictis omnibus? *Ex differentia temporum, vel nullum certum iudicium sumi pro Dæmoniorum spiritibus, vel admodum infirmum.* Hoc tamen examen prætereundum nobis non erat, quod per se infirmum est, id cum firmioribus indicijs coniunctum, rebū & vires accipit, magisque persuadet.

CAP. XXXVI.

An ex conditione illorum Spirituum, qui præcateris, certos quosdam homines persequuntur, iudicium de Spiritibus possit accipi, quod vel humani sint, vel Dæmonum.

Dubium non est quosdam esse Spiritus, qui certi hominibus, præcateris, sint molestiores. Illa ipsa loca, quæ ratione hominum, Spiritibus infesta esse diximus, nobis in hac causa suffragantur, sed quia de hoc aliás, hīc non plura. An spiritus hi Dæmonestantum sunt? an aliquando Spiritus hominum? An semper hominum? nunquam Dæmonum?

Molestiarum, quæ ab his afferuntur: malorum item, quæ infligunt, hīc rationem non habemus. Illa aliis discussa sunt locis; & quid ad spirituum discretionem faciant, demonstratum. Solorum spirituum habetur ratio. Quæritur, an qui viuentes certos inse-
quentur (sive graues multum sint, sive non sint, parum huius interest) Dæmones sint, vel humani spiritus.

Et aliquando hominum esse Spiritus, qui has molestias affe-
runt, videtur esse extra controversiam. Probant hoc suo exemplo Spiritus matris Neronis: Spiritus virginis Byzantinæ Cleonice; Spiritus imperatoris Galbae; vitalios quamplurimos omittam, quorum i. cap. & aliis, facta est mentio.

Exemplis his facilius creditur; quod ratio, quæ hanc rem im-
possibilem esse doceat, nulla sit: graues autem sint caussæ; quæ, ut quandoque fiat, egregie probent.

T

Qui

Qui pluribus aliquando molesti sunt Spiritus, an non vnum aliquem insequi possunt? Nisi forte iis legibus diuinitus astrictos esse dicere velimus Spiritus, vt & vno tantum loco viuentibus adsint, molestique sint; & præterea nunquam molestare valeant, nisi pluribus molestias afferant: quæ quis dixerit? dicenti quis crediderit?

6. Conueniens quoque est, & iustum; vt humani Spiritus molesti sint, & homines molestiis insequantur. Purgandi enim, si ab his nulla, ab illis multa exspectant solatia; an non hos insequentur, illos deserent? Damnati, cum male iis velint, qui ipsorum malorum fuerunt authores, & promotores; cur eosdem molestiis insequi non valebunt?

7. Veruntamen Dæmonum Spiritus, ut plurimum, esse crediderim, quia homines insequuntur. Causa præcipua huius est, quod quicunque insequantur, idem ferè persequantur: persecutio vero, quamvis ab alijs esse possit Spiritibus, non tamen semper tanta, quanta plerique affertur, esse potest: & vt possit, tamen non ad humanos; sed Dæmoniacos propriè Spiritus pertinet. quemadmodum Capite 29. dictum est.

CAP. XXXVII.

An ex conditione eorum, qui persequentes Spiritus patiuntur, possit colligi, humani ne sint Spiritus, qui molesti sunt, vel Dæmoniorum.

Num hic supponimus; alterum est explicandum: tertium definiendum. Supponimus quosdam viuentium pati, præ cæteris hominibus, infestantes Spiritus. Explicandum quid per conditionem hominum intelligamus. Definendum, an ex conditione hominum, qui molestias Spirituum sustinent, possit coniectura fieri, vtrum humani sint, vel Dæmoniorum Spiritus, qui molestant.

2. Primum illud supponimus. & ob id plurib. persequendum non est. Exemplis abundamus. alias quoque idem demonstratum est hoc iustissimis de causis fieri. Vide huius Disputationis Capita, 15. & 17. &c.

3. Conditionem viuentium, intelligimus statum vitæ, in quo ipsi degunt & versantur: veruntamen non quemcunque; sed qui cum improba vel honesta vita coniungitur: ita videlicet, vt mortales dupli-

duplicis conditionis dicere possimus; alios, qui sobriè, piè, & iuste vitam viuunt Christianam: alios, qui in graibus voluntur peccatis, & pro perditæ salutis habentur hominibus.

Quæstio igitur est, An ex his ordinibus, si infestantes Spiritus pati hos contigerit, deprehendatur; *Siné humanus, qui persequitur, Spiritus, an Diabolicus.* Et forsitan, mox quis suspicabitur, malos non nisi à malis; bonos non nisi à bonis infestari: sed tamen rem exactius consideranti aliud videbitur dicendum. Nec in alè.

Extra omnem controversiam est *ex probis & bonis hominibus certum iudicium peti non posse.* Quid ita? *Quia neque omnes, qui probos homines persequuntur, humani sunt spiritus: neque omnes spiritus Dæmoniorum.*

Quām integris moribus fuit sanctissimus Iob? quanta eius in sacris litteris commendatio? Vicitur vir simplex, & rectus & timens Deum, & recedens à malo: dicitur non similis ei in terra: & tamen gravissimas à spiritibus molestias sustinuit. An à bonis, & humanis tantum, homo bonus & humanissimus? Impiissimus Satan fuit, qui virum sanctissimum affixit.

Sic de integritate vītæ Germani Capuani Episcopi dubitare non possumus. Dat ipsi B. Gregorius testimonium insigne probitatis: & hic spiritus expertus est, quamuis non ita molestos. An bonus vir malos Dæmoniorum? Nequaquam: sed bonus bonus defunctorum hominum.

Et quid est, quæso, cur probi homines aut persequentes Dæmones pati dici non debeant; aut molestantes spiritus humanos? An Dæmonum spiritus ipsis malè velle non possunt? aut hominum ipsis opera nequerunt iuuari? Possunt hi (purgandos intelligo) si aliquorum; horum certè opera iuuari. Possunt illi malè ipsis velle; illi inquam iuratissimi bonorum omnium hostes & inimici.

Ex bonis igitur distinctio peti non debet. *An debet ex malis?* Debet magna: si non absoluta & omnimoda. Dubium vix esse potest, *solos esse malos, qui malos sequuntur, insequuntur, & persequuntur spiritus: probabile admodum, ex malis, Dæmoniorum ferè esse, non hominum.*

Bonos purgandorum spiritus malis, & desperata salutis hominibus molestos esse negamus. Quam ob rem essent? Aliorum salutis curam crederent habere, qui omnem propriæ deposuerunt? sed & hi vel non credunt spiritus defunctorum viuentium subsidiis iuuari: aut, si credunt, iuuare nolunt; & si vellent, parum

DE LOCIS INFESTIS

14. eorum s̄epe subsidia, tanquam dei hostium, apud altissimum Deum possent.

15. Malos Spiritus malos homines sequi; insequi; persequi quid mirum? Sequuntur ut socij; insequuntur ut promotores; persecuntur ut tortores & carnicices.

16. Gaudent malorum societate mali Spiritus. facit hoc similitudo morum & studiorum. Etiam Omne animal, inquit quidam, diligat sibi simile. Qui verò omnes percupiunt à Deo esse alienissimes; possintne eorum societatem fastidire, non expetere; qui vltro suis prauis studijs, se à Deo auertunt? Ad Dæmonum castra con fugiunt?

17. Promouent & impiorum studia impii Spiritus. Non satis ipse est mortales esse miseros; miseros cupiunt esse miseriores: miserimos. Quid si igitur his molestiis miseriores reddere possunt? an sibi deerunt? Fortè nequeunt his molestiis miseriores reddi? At posse, haud obscurè, quæ Capite 13. dicta sunt, insinuant.

18. Sed & tortores his molestiis mali Spiritus se ostendunt. Hoc quidem ipsi affectant: sed magno cum consilio, Deus Optimus nunc permittit, nunc præcipit. Quorundam tamen insignis est improbitas atque malitia; vt etiam in hac vita debeat vindicari. quod melius, quam persecutionibus, quas mali Spiritus perditis his hominibus efferrunt, demonstrari non potest.

19. Mali igitur Spiritus malis hominibus molesti sunt. An verò mali quicunque? an tantum Dæmoniorum? an etiam damnatorum hominum? Et Dæmonum, & damnatorum. De Dæmonibus res clara est. Pro damnatorum hominum, sunt spiritus Byzantinæ Virginis: matris Neronis Imperatoris; & Imperatoris Galbae: alios tanquam ex superioribus notos omittere.

20. Veruntamen, quia mali malos Spiritus potissimum patiuntur in vltionem scelerum, peccatorum, & perditorum, quæ agitur, vitæ; vt plurimum (si non semper) existimauerim esse Dæmoniorum Spiritus, qui molesti sunt, vt qui hic officium exequuntur, quod sicut ab humanis alienum est, ita ipsis, quasi proprium, tribui potest.

21. Quod si forma humana Spiritus hi quandoque conspicuntur, & illa etiam, quæ certorum hominum esse cognoscitur, quemadmodum fuit Byzantinæ Virginis, atque matris Neronis Imperatoris, illa ego simulatam dicerem, & non à Spiritibus defunctorum hominum circumferri: sed ab ipsis Dæmonibus, qui & illius sint authores, & sub illa ipsis Spiritus defunctorum, veluti in quadam imagine ostentent.

NOTA.

PARS ALTERA
NOTATIO IN SEQUENTIA ⁴⁹
Capita.

Derationibus & notis, quibus distinguntur, & cognoscuntur Spiritus humani, qui loca infestare solent.

Nnde humanorum Spirituum à Dæmonibus distinctio petenda sit, quantum ratione & coniectura consequi potimus, diximus: Nunc qua ratione humani (sunt enim duplicitis conditionis) distinguantur, inquiramus. Nam & hos internoscere necesse est eum, qui feliciter in liberandis, à Spirituum infestatione, locis versari velit: propterea quod non iisdem rationibus cum purgandis & damnatis agendum est.

In horum autem discrimine inuestigando idem, qui superius, seruandus est ordo: ut & formas, quibus apparent: & orationes, quas formant: & mala, quæ afferunt: & officia, quæ exercent, & locorum qualitates, atq; his similia scrutemur diligenter: & quia hos vel illos Spiritus, purgandos inquam, vel damnos prodat, notemus. Res quemadmodum difficultatem habet non paruam, ita non caret sua utilitate & voluptate. Sequentia facilius intelligentur, si singula cum præcedentibus iam explicatis rationibus conferantur. sed ad rem. A forma principium instituimus.

T 3

CAP^o

An, & quæ forma humanos inter se Spiritus, hoc est, purgandos à damnatis distinguat.

1. **N**on omnes formæ spirituum, sub quibus conspicuntur, hoc loco nobis discutiendæ sunt: quoniā non inter quoscunque spiritus, qui se viuentum oculis offerunt, discrimen inquirimus. Solū inspicienda est illa, quæ humanorum spirituum propriam diximus, Capite vigesimo sexto, & Vtrum, in ipsa, aliqua distinctio sit, qua humani spiritus differant, & cognoscantur, inquirendum: propterea, quod qua ratione solū humani inter se discriminantur, hoc loco quæramus.
2. *Vnam autem formam humanam diximus, quæ humanos spiritus prodat: illam videlicet, quæ ita humana est, ut peregrinum, & ab humana alienum habeat nihil; nullaque ratione, vel modo ab humana degeneret. Hæc enim, ut humanos spiritus prodit, ita utrisq; communis est; & iis, qui perpetuis inferni crux tibus addicti sunt, & qui alicubi, ob peccatorum suorum demerita purgantur.*
3. *Sed tamen non ita vna est hæc forma, quin discrimina & differentias multas admittat. Quemadmodum enim vna est omnium hominū, qui viuunt, forma; & quædā in hac sunt, quæ distinguunt virum à fœmina; senem à iuvene; Iudæum à Christiano; ægrum à sano; ita in vna, sub qua humani spiritus latent, formæ; quæ hos ab illis distinguunt, possunt esse discrimina.*
4. *Quintuplicia autem hæc discrimina putauerim. vnum à quantitate petitur: alterum à qualitate: reliqua tria ex mentis affectu, cuius esse videatur indicia primo differunt parui & magni: altero albi & nigri: tertio lœti & tristis; graues & leues; truces & amabiles. Hæc discrimina vni eidemque formæ humanæ possunt accidere. An vero omnia spiritus discriminant? Id definiamus.*
5. *Quæ à quantitate differentia sumitur, spiritus non distinguit. Nec paruitas damnatorum tantum spirituum index est, & magnitudo purgandorum: nec contra, magnitudo damnatorum, paruitas purgandorum. Possunt sub forma parua esse damnatorum, & purgandorum: iidem quoque possunt esse sub forma magna.*
6. *Quinimodo, quando in quantitate excessus est nimius, vel nimius defectus; non hominū, sed Dæmonum latere spiritus, alias docuimus.*

P A R S A L T E R A .

mus . Nec malè . Quoniam cùm idcirco rebus viuentium interfint humani Spiritus , vt cognoscantur ; apparere ea forma credi debent , quam ipsi dum corpora vegetaruunt , habuerunt ; quod non nisi ex hac cognosci queant .

Qui viui procero corpore fuerunt , sub magna , mortui , dum conspicuntur , apparent figura : qui paruo ; sub forma nani . At possunt feliciter mori , & ob id non damnari , illi possunt quoque hi . Similiter , possunt illi cum præsentis vitæ morte , mortem incurrere æternam : possunt quoque hi nani . Magnitudo igitur , siue paruitas , et si humanos spiritus distinguat quandoque à Dæmonibus ; non tamen humanos inter se distinguit .

Dissimilitudo qualitatis in forma , plurimum valet ad dijudicandos Spiritus humanos . Pro purgandis , nisi nox candorem vultus obnubilet , magnum argumentum est color albicans ; siue nativus , quem viui habuerunt : pro damnatis militat niger , clara præser-tim in luce : Non idcirco solum , quia communis id hominum habet sensus ; verum etiam , quia ut niger damnatis Dæmonibusque conuenit , & sub hoc frequenter damnati conspecti sunt : ita albicans conuenit bonis , beatisque ; & sub hoc conspecti , qui purgatorios ignes sustinuerunt . Seruit h̄c exemplum Isidori , quod ex Euirato in Prato Spirituali , Capite 39. refert Cæsar Baronius Tom. 6. fol. 625. circa annum Domini 513 . Isidorus hic genere Meliticensis , Monachus fuit Monasterij Philoxemes in emporio Cypri Dade dicto . & cùm Seueriani dogmatis aliquando fuisse assertor , vxori Catholicæ , quæ clam ipso communicauerat , sacram communionem per vim indignabundus , guttur eiusdem præmens , extorsit , indigneque tractauit . Sed statim coruscationem hostia sacra diffundente peccatum suum agnouit : post biduum vero , paratum sibi supplicium intellexit per Spiritum hominis damnati tales , qualem iam descripsimus . Rem refero ipsius verbis : Post biduum , inquit Isidorus , apicio virum , quasi Aethiopem , semicintyjs refutum , dicentemque mibi : Ego & tu simul in unum supplicium condemnatus sumus . Et ego ad eum . Tu , inquam , quis es ? Respondit : ego sum , qui conditorem Dominum omnium , Iesum Christum , in maxilla percusi passionis tempore . Hæc ibi .

Tristis , letaq; forma virisque spiritibus communis est . quamuis enim damnati , iustiorem tristitia causam habeant , & tristem vultum formandi non tamen sua carent tristitia purgandi ; ob graues , quos ipsi , quocunque etiam loco agant , sustinent dolores , & cruciatus .

DE LOCIS INFESTIS

ciatus. Nullum igitur hinc iudicium de spiritibus sumi potest.

¶. *Trux vultus omnino conuenit damnatis: amabilis purgandis. Sed an ille damnatis tantum; & non etiam purgandis: hic purgandistantum; & non etiam damnatis? Qnamuis hinc iudicium præcipitare temerarium sit: propterea, quod etiam beati Spiritus cœlestium mentium truces quandoque vultus formarint, & Dæmones formarint amabiles & Angelicos: facile tamen mihi paterer persuaderi solis damnatis truces, solis purgandis amabiles, aut certe non truces conuenire, propterea, quod cur truces purgandi; cur amabiles damnati simulent, causas non habeant.*

¶. *Grauitas & leuitas, quam exterior forma quandoque secum affert, Spiritus humanos non distinguit. Sed tamen status & conditio spirituum purgandorum potius grauitatem postulat, quam leuitatem; quam et si præse ferre possint damnati; ut tamen præ se ferant, nulla cogit necessitas.*

CAP. XXXIX.

An, & qui strepitus, atque gemitus prodant humorum Spirituum conditionem & statum.

¶. *Apote vigesimo septimo ex iis, quæ à spiritibus fiunt, & hominum auribus percipiuntur, hoc propemodum solo distinximus humanos à Dæmoniorū spiritibus; quod suspiria, gemitus, fletus, lachrymationes, si non semper: persæpe humanos spiritus prodant. An verò hac humanis utrisque tam purgandis, quam damnatis, communia? an his, aut illis propriæ?*

2. *Purgandis esse propria fortè quis inde coniecerit; quod opis & subsidiorum videantur quædam esse imploratio; quorum soli purgandi spiritus participes esse possunt. verum ad dñatos quoq; pertinere insinuat primùm (vt alios omittam) Christi oratio, qui in inferno docet futurum fletum, atque stridorem dentium. Tum deinde probat spiritus Galbae imperatoris, vtique damnati hominis; cuius ingentes gemitus aliquoties cum maxima sua molestia, obseruauit Imperator Otto. Tertiò confirmant illi spiritus, qui eiulatu & stridulo vocis sono, domum compleuerunt, quam Romæ inhabitauit Alexander ab Alexandro.*

3. *Interim tamen quamvis utrisque gemitus, eiulatus, atque suspiria sint communia: purgandorum tamen hominum propria quis non male*

male dixerit illa, que sine vlla impatientia significacione eduntur; & nihil, quod aperte damnatorum Spiritus prodat, continent.

Suspiria ducant damnatorum Spiritus, lachrymentur, fleant, 4.
eiulent: duo ferè semper sunt, quorum aut alterum, aut utrumque
ipso prodit; impatentia scilicet, quam ipse gemitus atque eiul-
atus secum affert; vel aliud quid, quod purgandis Spiritibus tri-
bui nequit.

Patientiam in luctu, suspiriis, atque lachrymis, magnum præ-
bere argumentum, pro purgādis Spiritibus, inde clarum est; quod
quamvis grauissimos cruciatus sustineant, non tamen impati-
entes fiant, nec vlla impatiētia dent signa, perfecti iam in charitate.
Contrà, damnatorum Spiritus, quemadmodum impatiētissimè
ferunt quæunque sustinent supplicia; ita impatiētia suæ non ra-
rō dant testimoniā clarissima.

Nouum verò, quod d. purgandorum patientia diximus, vi.
deri non debet, quia cognoscunt & iustissimas esse, quas persoluūt
pœnas: & à clementissimo parente ipsis, tanquam charissimis fili-
is, infligi: & finem breui habituras: & in summum, æternumque
gūdium esse conuertendas.

Impatiētia porrò patientissimi cur darent signa? & mortali-
bus darent, quorum ipsis, lachrymis atque suspiriis, opem implo-
rant? sufficit ipsis, si miseriam suam explicit: hic multis impati-
entia argumentis indigent.

Nec ob id impatiētes habendi sunt, quod à pœnis liberari
desiderent: vt ineptè quidam argumentantur. An etiam Chri-
stum impatiētia accusabimus, dum à se petiit transferri passio-
nis calicem?

Sic de impatiētia damnatorum certa res est. Non volunt agnos-
cere iusta esse sua quæ, pro peccatis, patiuntur supplicia. Et, quam-
uis iusta agnoscērent, odio tamen haberent implacabili, tum Dæ-
mones, qui supplia infligunt, tum Deum, pro cuius voluntate
atque imperio infligunt. Et si hæc non essent, vel id eos im-
patientes redderet, quod nec fructum suorum suppliciorum vllū
speren; nec ipsorum vllum in omnem æternitatem exspectent fi-
nem. Qui verò tot de causis impatiētes sunt; impatiētiam suam
postulat dissimilare, simulare patientiam?

Hinc est, quod quicunque obseruati sunt spiritus purgandi,
non modò nulla impatiētia; sed multa quoque dederint patien-
tia signa: quemadmodum inter alios illi probant, quorum me-
minit B. Gregorius. Contrà, illi, qui damnati fuerunt, cum eiulatu
& suspi-

DE LOCIS INFESTIS

& suspiriis coniunxerint clamores, rugitus, aliaque impatientia
haud leuia argumenta.

CAP. XL.

An, & quæ oratio humanos inter se Spiritus purgandos, inquam, à damnatis distinguat.

1. **D**iximus capite vigesimo cœtauo *Orationis* multas esse species; sed quæ humanorum Spirituum sit propria, vnam esse, boni petitoriam. Nunc vtrum in hac aliquid sit. quod humanos inter se differre faciat; & purgandos, vel damnatos prodat, inquirimus.
2. **E**sse, quidam negare possent: sed tamen qui penitus orationem petitoriam inspexerit; & quas conditiones habere possit, attenderit; non malè dixerit, aliquam inueniri, quæ purgandos spiritum prodat. Illa est, quæ & boni propriæ est petitoria, & peccati lordinibus inquinata non est.
3. Bene hæc dici, clarum erit, si duo demonstrauerimus. Alterum est, purgandorum Spirituum orationem esse propriæ boni petitoriam; damnatorum non item. Alterum, purgandos peccare non posse; damnatos non posse non peccare. His duobus fundamentis Assertio nostra incumbit.
4. **P**rimum conditio Spirituum, qui apparent, confirmat. Proposatum est purgandis, vt viuentium auxilia, & subsidia obtineant, eorum suffragiis iuuentur. Quod si igitur aliquid, hoc præcipue oratione sua querent. At damnatorum alia conditio. Sciunt miseri nihil se subsidij à viuentibus obtainere posse; nullam habere spem remissionis pœnarum, quas sustinent; cur igitur serio viuentium operam implorare dicendi sunt?
5. **A**lterum omnium propemodum Theologorum habet sententia. Docent illi fieri non posse, vt purgandi Spiritus peccatum aliquod committant. Docent damnatos non posse non peccare. An forte errant omnes?
6. Scimus Lutheri esse assertionem, quod qui in purgatorio degunt, peccant continuo. Sed apud nos plus omnium, quam vnius Lutheri valet authoritas. Si continuo peccant purgandi; quis tandem purgatorijs finis? Neque enim vñquam plagarum modus & finis erit; si nullus sit finis & modus delictorum.
7. **Q**uomodo peccare dicendi sunt, quibus facultas nulla est; ut quicquam

quicquam, quod ad gloriam, aut vitam æternā illis proficit, faciant? An fortè etiam in illa vita mereri contingit? Præsens vita sementis est, non futura. Cum nox venerit, inquit Dominus, nemo poterit operari, Ioan. 9. Quæ seminauerit homo (hac in vita, vbi sementis tempus) hæc metet, Galat. 6. Non poterimus villicare, vbi semel in fine vitæ villicationis ratio fuerit reddita. Lucæ 16. Sed & ad bonorum operum exercitium ita nos hortatur Sapiens, Ecclesiastici 14. ut significet in futura vita illa locum non habere. Ante obitum tuum, inquit, operare iustitiam: quia non est apud inferos inuenire cibum; & alibi Ecclesiastæ 9. Quodcumq; potest agere manus tua, instanter operare: quia nec opes, nec ratio, nec sapientia, nec scientia est apud inferos, quæ tu properas.

B. Cyprianus, Sanctissimus Martyr, sermone 4. qui est de Mortalitate, etiam hanc ob causam dicit prodesse mortem, quod à peccandi periculo liberat; cui, quamdiu in hoc præsentis vitæ spacio decurrimus, expositi sumus. Non displicet sententia Martiris Magno Augustino. Eandem his verbis refert, Libro de Prædestinatione Sanctorum cap. 14. His, inquit, atq; huiusmodi, Doctor ille, sententia in Catholicæ fidei luce clarissima, satis aperteque testatur, usque ad huius corporis depositionem peccandi pericula, tentationesque metuendas: deinceps nulla talia quæcumque esse passurum. quod et si non testatur; quando de hac re Christianus, qualiscunque, dubitaret? Ita Augustinus.

Cæterum, vt purgandi peccare non possunt, ita non possunt non peccare damnati. Hoc quamvis non ita, vt prius illud, extra omnem controvèrsiam videatur; verò tamen est magis simile, ob odium, quo acerbissimo Deum persequuntur: & authores insig-
nes, qui hanc sententiam defendant. Inter quos haud postremus est Dominicus Soto in 4. dist. 10. q. 1. ar. 4 & 5.

Fortè & hoc insinuat Regius Propheta, dum Psal. 73. superbiā eorum, qui Deum oderunt, docet ascendere semper. Qui enim Deum magis odio habent damnatis? Si verò superbia eorum semper ascendit; quomodo non peccat semper? Semper bene faciunt, qui sunt in cœlo, beati: semper malè facient, qui sunt in inferno, damnati. Non volent illi quicquam mali facere, quod Deum offendat: quia Deum amant. Non volunt hi quicquam boni face-
re, quod quouis modo Deo placeat: quia Læti capitales, & iurati sunt hostes. Vide pro hac re, Tom. 2. Ludouici Molinæ, in 1. par-
tem D. Thomæ, circa art. 2 quæst. 64.

Hæc cùm sint; cùm purgandos deprecatoria deceat oratiq; damnatos non item: Rursus, cùm non possint peccare purgandi

15. spiritus; & non possint non peccare damnati: omnino necesse est, ut si quam orationem edant Spiritus, quæ & boni continet pre-
cationem; & nulla peccati labe sit respersa; purgandos Spiritus, non
autem damnatos eandem demonstrare.
12. Interim tamen admodum difficile est iudicium hoc, quod ex oratione
sumitur. difficillimum est ex hac Spiritus humani conditionem
colligere. Quare? quia difficillimum est, vtrum peccati labe ora-
tio careat, an illa infecta sit, deprehendere.
13. Quoties impositum est mortalibus facta oratione à spiritibus?
Quot sunt, qui, specie orationis decepti, cùm putarent esse pur-
gandas animas, & bonos Spiritus, qui secum agerent; deprehen-
derunt tandem esse versipelles? malos? nequam? Dæmones?
14. Difficultatis huius ratio ex eo pendet; quod oratio per se san-
ctitatem & pietatem non habeat; sed omnem à mente ipsorum,
quorum interpres est, accipiat: mentis verò ea sit conditio, vt non
semper se oratione prodat: nunc aliud velit, aliud oratione signi-
ficit: nunc sonet pietatem, foueat autem impietatem, &c.
15. Est igitur difficile iudicium, quod ex Spirituum oratione su-
mitur. An etiam impossibile? Non hoc dixerim. Tria putarem esse,
qua si in oratione inueniantur, probabilem conjecturam faciant,
ipsam simulatam non esse, hoc est, vitio carere; & ob id purgan-
dorum Spirituum esse indicem.
16. Primum est, si apertè, & ex suo genere, vt vocant, mala non sit; hoc
est, nec in Dei cedat iniuriam; vt est illa, quæ cum blasphemia est
coniuncta: nec proximo incommodet, vt in detractione, conui-
tiis, contumeliis, malis imprecationibus, turpiloquio & caccidit.
17. Alterum, si non solum ex genere suo mala non sit, sed quoque sit
bona: qualis est, qua vel Dei promouetur honor; vel nostrum aut
proximorum emolumentum. Prioris generis erit, si ad Deo Sa-
crificium offerendum hortentur Spiritus: Posterioris, si ad ele-
emosynam pauperibus erogandam, aut sibi auxilium præstan-
dum inuitent.
18. Veruntamen hoc nequaquam sufficit; præterea, quod bona et
iam malè fieri possint. Deprehensum est certis exemplis malignos
Spiritus fuisse, qui viuentium orationes postularunt. Petrus Mar-
marius in Gallia narrat Confollenti, ad Viennam fluum, anno
1478. fuisse Spiritum, qui animam defunctæ esse prædicasset;
eundemque gemitis, clamoribus, & querimoniiis omnia com-
plesse; monuisse etiam habendas preces, peregrinationesque ob-
eundas; præterea res veras plurimas reuelasse: sed qui tandem sit
prodigium.

proditus esse Dæmon; cùm dicentī sibi cuidam: *Si vū tibi haberis fi-*
dem, dicio: Miserere mei Deus, secundum &c. respondisset, Hoc à se si-
er in non posse. Ita Bodinus lib. 3. Dæmonom Capite 6.

Necessaria est igitur præter dicta, intentio recta, vt scilicet, id,
 quod petitur, eo fine petatur, quem natura sua postulare videtur.
 quemadmodum enim peruersus operantium animus omnia alia
 opera, ita orationem Spirituum, qua etiam recta petuntur, cor-
 rumpit; adeoque efficit; vt recta non recte, sed male petantur.

Intentio hæc, cùm ex aliis, tum ex duobus maximè deprehendi-
 tur. Vnum in ratione petendi; alterum in forma orationis contine-
 tur. Sæpe ex ratione petendi; sæpe ex orationis forma innotescit
 petitis animus. Potest Spiritus viuentium orationes atq; suffra-
 gia postulare; qui tamen si rogetur, petatnē in Christi nomine, sta-
 tim illud sit recusaturus. Potest etiam propter Christi merita, vel
 Christi nomine petere; sed ea loquendi forma; vt non tam petere,
 quām non petere, ab auditoribus iudicetur.

Quando igitur non mala, sed bona peterent Spiritus à viuenti-
 bus, peterentq; sibi conuenientia: peterent per Christi merita:
 & oratio nullam ironiam contineret, nullam leuitatem ostende-
 ret, omnino illam dicerem peccato carere, atque idcirco non dam-
 nati, sed purgandi alicuius Spiritus esse.

Ex dictis colligitur, quām multiplices esse possint damnatorum
 Spirituum orationes. Primum illa damnatorum erit, qua nihil
 petitur; sed vel præsentia, vel præterita, vel futura tantum refe-
 runtur. Deinde illa, qua quidem aliquid petitur; sed tamen per-
 nitiosum. Rursus illa, qua et si specietenus contineat petitionem
 honesti; reuera tamen est praua: quia Christi nomen atque meri-
 ta excludit. Denique illa etiam, qua quamuis Christi nomine ali-
 quid peti videatur, si sonum, quem auribus percipimus, attenda-
 mus, non tamen peti forma pronunciandi, prædit.

Et quamuis hæ orationes omnes damnatorum hominum es-
 se possint: non tamen *solorum sunt hominum damnatorum*. Omnes,
 qualescumque tandem sunt, possunt esse Dæmonum. Atque
 hoc est, quod secundo loco probandum hoc Capite
 suscepseramus. Verūm, quia hīc omnium
 pro nobis sententia est, finem
 Capiti imponimus.

CAP.

An ex malis, & molestiis, quæ ab humanis Spiritibus afferuntur, cognosci possit: quæ sit conditio humanorum Spirituum, qui infesti sunt.

1.  *Venadmodum difficile fuit Capite 29. ex malis, quæ afferuntur per Spiritus, humanos distinguere à Dæmonibus: ita haud minus difficile, ex ipsis inter se distingue re humanos. Quia tamen molestiæ tantum videntur humanis Spiritibus reliæ; & mala grauiora, Diabolis authoribus, accident: fortè, si molestias, quæ à Spiritibus excitantur, penitus introspiciamus, aliquam, quæ humanos Spiritus inter se (sed tamen non à Dæmonibus) distinguat, inueniemus differentiam. Vtrumque præstemus, posterius priùs.*
2. *Molestiarum nullam esse, cuius Dæmones authores effe nequeant, nullus negauerit, qui Dæmonum conditionem probè perspectam habuerit. Liberi sunt arbitrij Dæmones; & ita quidem, ut cum libero eorum arbitrio egregia virtute, protestate que polleant. quâ igitur potestate instructi sunt; possunt molestias excitare: quâ libero arbitrio pollent; possunt excitare quas volunt, magnas, paruas, perniciose, non perniciosas.*
3. *Et si exemplis hic agendum est, possumus producere alia, quibus doceamus maximos tumultus ipsis Architectis excitatos esse: alia etiam, quibus leues, & ludicras quasi molestias. Quod hic possunt humani Spiritus; non poterunt viribus præstantiores, Spiritus Dæmoniorum?*
4. *Habent igitur hoc commune Dæmones cum Spiritibus humanis. Vtrique leviter molesti esse possunt. Frustra igitur, ex molestia, ipsorum distinctio petitur.*
5. *Veruntamen si molestias iam conflet ab humanis proficiunt Spiritibus; licebit alicunde coniijcere, non purgandos; sed damnatos esse Spiritus: & rursus esse purgandos; non damnatos, à quibus ipse afferuntur.*
6. *Et damnatos prodet primò, si cum molestia allata, ad peccatum aliquod excitentur viuentes, qualecumq; etiam illud sit Hoc enim, cùm à purgandis Spiritibus sit alienissimum, quemadmodum superius capite quadragesimo, Thesi 67.&c. probatum est; non alias, quam damnatos Spiritus, potest habere authores.*

Deinde

Deinde prodet eosdem leuis atq; scurrilis gesticulatio; cum molestia coniuncta. Quis hanc in purgandos spiritus dixerit conuenire; quorum illa conditio est, ut, quo ueum offendant committant nihil.

Prodet tertio damnatos, si molestiam non aliam ob causam, quām vt viuentes vexentur, & ad vexamem nulla utilitas redeat, suscep-^{8.}
ta deprehendatur. Nequit illa à purgandis spiritibus esse; vt quibus, non vt molestent tantum, sed vt sibi molestia consulant, no-
straque patrocinia obtineant, propositum est.

Produnt hæc damnatorum spiritus. At purgandos illa solūm
molestia, quæ levitatis habet nihil. ad nullum incitat peccatum; & hoc so-^{9.}
lo nomine suscepta est; vt viuentes habeantur attenti, spiritus conditio-
nem, miseriamque cognoscant, & subsidijs iuuent.

C A P . X L I I .

*An obsequia quedam à spiritibus praestentur, ex
quibus coniici possit discriminem inter huma-
nos spiritus.*

Acilis est ad id, quod hoc Capite quæritur, responsio.
Est quæritur, sine aliquod discriminem inter obsequia, quæ
à spiritibus præstantur viuetibus, quod humanos inter se
distinguat. Respondeatur nullum esse. Causa huius ex ijs,
quæ Capite trigesimo dicta sunt, in promptu est. quia, vt ibidem
diximus, nulla sunt obsequia, quæ humanorum spirituum ita
propria sunt, vt non etiam Dæmonibus illa conueniant, aut à Dæ-
monibus valeant præstari. Cùm verò ea debeat esse obsequiorum,
quæ humanos spiritus distinguant, conditio; vt primum humanis
spiritibus tantum conueniant, nō autem Dæmonibus: tum deinde
eosdem inter se distinguant: si propria nulla sunt; quomodo di-
stinguent?

Hoc quamvis ita sit: quamvis hic certi minus constitui queat,
quām in iam dictis discernendi rationibus, vna tamen Obsequia
sunt; quæ quod ab humanis sint, & quidem certis spiritibus, certū
est: licet interim ex his de spirituum conditione, in particulari,
certum iudicium ferre temerarium sit, (coniectari licet) propte-
rea, quod, in particulari, conditionem Obsequij perspicere sit
difficillimum.

Affirmatio hæc quatuor constat membris. Primum est, esse ali-^{10.}
quod obsequiorum genus, quod humanis tantum spiritibus con-
geniat.

- ueniat. Alterum, hoc Obsequiorū genus certos prodere spiritus, purgandos scilicet. Tertium est, difficillimū esse cognoscere hæc.
4. Obsequia, dum à spiritibus præstantur. Quartum est, ex circumstantiis quibusdam & accidentibus, posse aliquam de iis conjecturam fieri. Omnino ostendimus.

Esse aliquod Obsequiorum genus, quod non nisi humanis spiritibus comperat, docent illa officia, quæ per se honesta sunt & nullius circumstantiarum accessione vitium contrahunt. Nam & talia quædam inueniuntur; & à spiritibus possunt prestatari: & authores non possunt habere Dæmones. Omnino igitur necesse est, ut humanos prodant spiritus.

- Quid hæc dubium? Antalia inueniri Obsequia? At hæc non negaverit, qui se Catholicum haberi velit. Et profectò nisi omnia, quæ sunt, peccata dixerimus: nisi Deum ad peccata mortales hortari impiè fassi fuerimus: nisi velimus afferere, nullam nobis esse impotitam necessitatem aliquid benè agendi; oportet concedamus, similia Obsequia inueniri.
6. Anfortè à spiritibus hæc fieri nequeunt? Cur quæso? Fortè semper spiritus peccant: at quis tunc finis erit purgatorij? Fortè licet non peccant semper; hæc Obsequia præstare nequeunt? at præstant etiam his maiora. Qui Deum possunt laudibus celebrare, ut celebrent: qui persoluunt, quia meruerunt, pœnas: qui rebus humanis

7. sine peccato intersunt; cur necessariò peccant, si sua hominibus Obsequia offerant & præstent? cùm & nulla lege hæc ipsis sint prohibita; & non hominum cedant commodum atq; emolummentum.

Quod verò hæc obsequia Dæmonum ministerio non exhibeantur, clarum est. Quæ à Dæmonibus proficiuntur; vniuersa; vel talia sunt, ut per se, & ex natura sua, reprehensionem mereantur; vel quamvis ex se bona sunt, intentione tamē & volūtate peruersa operantium depravantur. Nihil est, quo à Dæmones possint præstare bene. nullum obsequium exhibent Nequam; quod, quamvis sanctissimum in speciem appareat, non æternis, infernalibusque suppliciis sit dignum.

8. Quid hinc sequitur? quid? Illud ipsum, quod primo Assertionis nostræ membro continetur; *Esse quædam Obsequia, quæ non nisi humanos spiritus authores habent: illa scilicet, quæ per se honesta sunt, nec ullius prauæ circumstantiæ accessione foedantur.*

Cæterum, quemadmodum hæc Obsequia spiritus hominum distinguunt à spiritibus Dæmoniorum; ita eodem modo prodit conditionem humanorum spirituum: produnt, inquam, purgandos.

viii

P A R S A L T E R A .

titus. Atq; hæc secundum est Assertionis membrū. Et quidni proderent? Necesse est, vt cùm humanorum sint spirituum; vel sint purgadōrum, vel dæmonatorum. At vt horum sint, dici non debet. eadem horum, quæ Dæmonum est conditio; vt bene agant nihil; peccent in omni tempore: erunt igitur purgandorum spirituum

Difficillimum tamen est hæc Obsequia discernere; quod plurima sint, quæ ad ipsa requirantur. quorum quamvis aliqua, quæ sensibus obvia sunt, capiamus & probemus; tamen illa, quæ sub sensum non cadunt (quæ tamen & ipsa ad integratam operationis, si bona esse debeat, necessaria sunt, vt sunt fines, qui agentibus proposici esse solent) non perspicimus.

Magna horum finium vis est, magna potestas. Nullum est opus ex genere suo, suaque natura ita perfectum & absolutum; quod hiscīj fines non depravent. Nullum, quod tanta emolumenta, vel rebus publicis, vel priuatis hominibus affert; quod reprehensio no careat, si peruersus sit operantis animus, fines sunt, qui coronant opera.

Hi fines etiam Obsequiis, quæ à spiritibus præstantur, se inserunt. etiam Obsequia, quamvis ex se honesta sint, prauè & peruerse fieri possunt quomodo vero? quia possunt à malis afferri atque exhiberi spiritibus; quorum, vt ingeniu nequam; ita praui in agendo fines. Ut propterea optimè à nobis tertio loco, sit dictum, difficillimum esse de obsequiis, qualia sint, iudicium ferre.

Quamvis autem præcipitare hic iudicium temerarium sit; & levius animi certum ferre: si qua tamen sunt, quæ probabile testimonium quandoq; his obsequijs, quod recta sint, & cu' pa' careant, præbent.

Inter alia vero præcipue sunt tria: humilitas, constantia atque grauitas. Si Obsequia, ex se alioquin honesta, cum humiliitate constantia, atque grauitate coniuncta sint, verisimile est culpa ipsa vacare.

Per se hostes & inimici sunt bonorum operum. & Obsequiorum honestorum mali spiritus: Ut humilia exerceant, superbia eorum, quæ semper ascendit, non patitur. Et vt semel, atque iterum aliqua exerceant in specie humilia; vix poterunt adduci, vt in iisdem sint constantes. Et vt constantes sint etiam; vt tanq; à leuitatis & nequitatē indicis abstinent, fieri potest difficultas admodum,

X

CAP.

An officia quædam otiosa & ludicra sint, quæ inter Spiritus humanos, damnatos & purgandos, distinguant.

1.  Vnde ad quæstionem propositam respõdeatur in promptu est, si quæ Capite trigesimo primo dicta sunt, difficultatem nullam habent. Dictum ibi officia otiosa humanis spiritibus vel nullo modo conuenire, vel certè conuenire rarissimè, & aliquibus tantùm. Hinc plenum est, ex his inter humanos spiritus nullum discrimen petendum esse. Quid enim? poteruntne hi spiritus differre re aliqua, quæ neque utrisque diuersa; neque alteris ipsorum, aliqua ratione conuenit?

2. Atque hoc insinuasse sufficerit. Verum quia duo sunt, quæ fundamentum assertionis nostræ euertunt, hæc dissoluenda sunt; præsenti Capite, priusquam ulterius progrederi oratio. Vnum est, quod (ut Olaus magnus refert lib. 3. cap. 11. Histor. Septent.) ludum & concentum nocturnorum spectrorum in partibus Aquilonaribus, incolæ credant excitari ab animabus, quæ se corporeis voluptatibus, dum viuerent, immerserunt. Alterum, quod hastiludia, & congressus bellici, in agro Vormatiensi, de quibus i. capite Thes. 20. non videantur, nisi humanos spiritus habere authores: quemadmodum primùm quidem ipsorum probat confessio: tum deinde oratio, qua viuentium subsidia atque preces implorârunt.

3. Veruntamen assertioni nostræ nihil hæc obsunt, quoniam vel officia hæc fuisse otiosa negandum est: vel, si id concedatur, negandum hominum spiritus fuisse, à quibus sunt patrata, & exhibita.

4. Atque ut de spectaculis Aquilonaribus primùm dicamus, non negauerim ludicra & otiosa esse officia, quæ præstiterunt; negauerim vero humanos esse spiritus, à quibus illa præstantur. Loca, quibus hæc officia præstantur; personæ, in quarum præsentiæ præstantur; effectus denique, qui absolutis chœris in adulto gramine deprehenduntur, pro Dæmonibus magna præbent argumenta: ut de officijs ipsis nihil dicatur.

5. Nec multitudo contrarium opinantium contrarium suadere debet. Quot apud Aquilonares populos sunt superstitiones? Idem illi populi (eodem Olae teste, lib. 2. ap. 3.) submeritorum, & violento casu occisorum animas volunt errare in promontorio Ilædiæ, illo, quod instar Aethnæ, perpetuis ignibus æstuat. Vnde hoc illorum

illorum iudicium? An violenta morte occisi, erant post mortem
in terris omnes? Et, ut nostrum exemplum persequamur, Vnde
constat voluptatibus corporeis deditos fuisse, qui choreas Eluarum,
ut vocant, ducunt?

Hastiludia, & congressus bellici, in agro VVormatiensi, vel ab officiis 6.
Otiosis excipiuntur; vel si Otiosa sunt; ab humanis Spiritibus non
exhibitentur. Et quamvis vtrumque probabiliter dicatur, negare
tamē potius otiosa esse; ne temerē damnare videar ipsorum au-
thores; quād de spiritibus duram ferre sententiam; & officia ipsa
ad otiosorum classem reuocare.

Neq; enim quæcunque possunt habere speciem leuitatis, lenia 7.
mox atq; otiosa existimanda sunt. Quædā in speciem leuia; possunt
magnis grauibusq; de causis fieri: ob quas idcirco seria, non leuia,
haberi debeant. In horum genere hęc exercitia militaria, in campo
VVormatiensi exhibita dixerim. Habet hoc diuina prouidentia,
vt quandoque iis ipsis rebus, quibus à peccatoribus offensus est,
peccata vindicet. Itaque quia pugnando Deo milites illi offend-
re potuerunt; potuerunt & hac simulata post mortem pugna, pec-
catum, quod pugnando perpetrārunt, expiare.

C A P . X L I I I .

*An ex locis sacris atque profanis; item cultis atque in-
cultis possint distingui hominum Spiritus,
per quos loca redduntur infesta.*

Dicitur primò, Vtrum sacris & profanis locis distinguantur
humani Spiritus. Secundò; Vtrum distinguantur cultis,
& non cultis. Illud si explicatum fuerit, reliquum hic,
Quod explicetur, erit nihil. Quomodo verò? Quia cùm dictum sit,
cap. 32. humanos Spiritus, non in cultis, sed cultis locis errare: si ipsorum
conditio ex locorum differentia cognoscenda est, oportet in ipsis
cultis locis quo differant, aliquid inuenire. atqui hoc in proposito
nihil potest esse, nisi sacram & profanum. Ex hoc igitur, Vtrum dis-
cerni possint humani Spiritus, inquirendum.

Duobus vero modis, his locis, possunt distingui Spiritus hu- 2.
mani. Vnus est, vt alij admittantur ad loca sacra, alij ab iisdē repel-
lantur:

Iantur: quos ad Dæmones distinximus cap 32. ab humanis Spiritibus. Alter est, ut utriusque quidem ad sacra loca admittantur; sed hi ad illa, isti ad alia. Cum enim loca sacra duplicita sint (hæc enim sola nobis proposita sunt) templo siue oratoria; & cæmiteria; si hæc illis tantum tribuantur spiritibus, ista aliis; hoc ipso inter spiritus distinctionem deprehenderimus, quo ipsos his aut illis locis versari atque molestos esse demonstrauerimus.

3. *Quomodo igitur ad hæc loca se habent spiritus humani suntne qui utraque loca sacra declinant? aut si quidam non utraque, sicut declinant altera?* Primùm purgandos spiritus, tum deinde damnatos examinemus; & quod coniectura consequi possumus, dicamus.

4. *Purgandi non videntur declinare Cæmiteria. Cur declinarent?* An quia consecrata sunt, & sancta loca? an quia Ecclesiæ precibus & orationibus iis proscripti? an quia negotium suum licet agere nequeunt? an etiam loci ipsi non repugnat. Nam & ipsi quodammodo sancti dicuntur, & perfectius multò, quam ipsa cæmiteria. Ecclesiæ precibus proscripti non sunt, ut quæ ipsi (tantum abest, ut hæc loca inuidet) etiam optet multò præstantiora, cœlestia, inquam, palatia. Et si ullibi; profecto hic suum possunt agere negotium: ubi & hominum turba frequens; & locus ad orandum profunctoris per se inuitat.

5. *Sic à Templo hos spiritus non abhorre multò est verisimilius.* Nam præter iam dictas causas, in templis etiam habent, quibus afficiuntur, res sacras & multas, & magnas, & varias; quæ, ut honorem Dei egregie promouent, ita non possunt non iis esse gratissimæ, qui honoris Dei, in rebus omnibus, & præ rebus omnibus, sunt studiosissimi.

6. *Forte & irreuerentiam cedit Dei, quod ad Templo, Dei inquam domos, hos spiritus admittamus. Non cedit. Neque quicquam irreuerenter hi spiritus agunt; neque ipsorum per se præsentia ullam potest sacris locis afferre irreuerentiam.*

7. *Forte Deus vult ipsos his locis esse exclusos. Sed unde id constat? si fines, qui Deo propositi sunt, in horum spirituum ad viuos reditu, attendamus, non tam his locis exclusos, quam admissos merito iudicabimus, cum etiam hic, per hosce spiritus, possit Deus suæ clementiæ, atque iustitiæ dare argumenta: & ipsi his locis viuorum suffragiis fieri participes.*

8. *At sororem suam, inquit aliquis, quamdiu purgatorio igne expiabatur, ad limen quidem Ecclesie, in vecte nulla peruenisse,*

Ecclesie

P A R S A L T E R A .

Ecclesiam vero nequaquam intrasce obseruauit B. Malachias. Respondeo obseruasse quoque S. Virum, post fusas ad Deum preces, eandem in candida ueste Ecclesiam intrare, quamuis pro peccatis perfectè nondum satisfecisset Sed siue intrauerit Ecclesiam, siue intrare nequiuierit; manet sua assertioni nostræ veritas: quoniam per visum ostendebatur Malachia quis fororis status, reuera vero ipsa nec Ecclesiam intrabat, nec ad limen Ecclesie hærebat. Videntur S. Bernardus in vita Malachiae.

Cæterum damnatorum spiritus in Templis versari, & oberrare, molestiamque parere viuentibus, vel non crediderim, vel non nisi rarissime, atque in uno forsi in casu concesserim. Quid in Templis quod agant, habent? An viuentium ibi exspectant suffragia? Desperatissimæ eorum res sunt. An sacris rebus, quarum in Templo magna copia est, recreantur? Nihil iis placet sacrum. An gaudent pietatis, quæ in Templo sunt, ex exercitiis? Hæc detestantur vniuersa.

Fortè quod dicimus confirmat exemplum Valentini, virilis. brici, & cunctis leuitatibus occupati, ut Gregorius loquitur (lib. 4. Dialog. cap. 53.) cuius corpus in Ecclesia B. Syri Martyris sepultum quidem fuit, sed mox inde extractum. Nocte enim media, post sepulturam, inquit idem Gregorius, in eadem Ecclesia facta sunt voces, ac si violenter ex ea expelleretur. Atque cum concurrent custodes, duos terribiles spiritus videbunt, qui Valentinum, ligatum pedibus, foras traherent: qui mane facti sepulchrum aperientes, corpus non inuenierunt. Hæc Gregorius. Idem exemplum refert Concilium Triburiense Cap. 71. si vero damnatorum hominum corpora Deus Templis vult esse proscripta, Templa infestari patientur ab eorum spiritibus? spiritibus, à quibus corpora, quam ignominiam sustinent, habent omnem?

Inus forsan casus ad Templo agit damnatorum Spiritus, etiam inuitos quando, videlicet, ipsorum corpora in Templis sunt conditi; & vita anteactæ mores atque scelerata postulant, ut non modò infernalibus suppliciis extinguiantur; sed etiam de extrema ipsorum miseria constet mortalibus: tum fortè iustissimo Dei iudicio fit, ut circa sua sepulchra errant miseri, & hac ratione inflicitatis suæ mortalibus præbeant argumenta. Hoc de Templis.

A cemetery non ita facile ex iudi possidenteur damnatorum spiritus. 120 Quid ita? Quia communis mortalium sensus est, saepè defunctorum manes circa sepulchra versari, oberrare, conspicere. Quid inde? hoc scilicet, ille etiam damnatorum hominum Spiritus, qui quandoque conspicuntur. Quo modo vero? Quia verisimile non

est, solos esse purgandos, de quibus hæc communis, & apud omnes recepta est opinio.

13. Nec est, cur hos Spiritus à Cemiterijs excluderimus. Quam enim ob causam? An ad hæc loca redire non affectant? at ex affectu ipsorum de nullo loco iudicium ferendum est: quoniam si per ipsos staret, ad viuos redirent nunquam. Nulla ipsis grata sunt loca, quemadmodum superius docuimus. An orationibus Ecclesiæ his locis prohibentur? at dubium est, num iis quidquam cum autoritate, Ecclesia præcipere aut mandare possit. Sed nechis locis ab Ecclesia proscripti sunt. Proscriptio, quæ in locorum horum consecratione facta est, malignos solum Spiritus (Dæmones intelligo) attingit; quemadmodum ex forma, qua in proscriptione Ecclesia vtitur, est manifestum.

14. Quaniobrem, vt Caput hoc concludamus, ex locis sacris, si non perfecta & absoluta; aliqualis tamen differentia petitur, qua humani inter se Spiritus distinguuntur. Quamuis non Cemiterijs differant; differretamen videntur Templis: ut probabile argumentum sit, non damnatos, sed purgandos esse Spiritus, qui in Templis sive quen-
tius obseruantur.

CAP. XLV.

An, Et quomodo loca, ubi mortes hominum precesserunt, Et graui peccata com missa sunt, manus, damnatorum Et purgandorum,
Spiritus distinguant.

1. **V**m Capite trigesimo tertio de locis, post mortem alicuius, infestis, infestis item ob gratia, quæ iisdem perpetratata sunt crimina, ageremus; solos propemodum ad illa, humanos Spiritus admisimus. Nunc, ne, quæ hæc tenus tenuimus, ordinem infringamus, An, & quomodo humanorum spirituum distinctio hinc accipi possit, dicendum est.

2. Ego verò hīc ex duobus maximè spirituum conditionem comprehendи crediderim: ex anteacta vita; sed præcipue ex vitæ termino. Cum enim hæc ad futuræ vitæ statum pertineant plurimum; omnino ex his, de statu defunctorum iudicium peti posse videtur.

3. Et in purgandorum spirituum classe illos posuero, qui aut vitam pie, & iuste, & sobriè transegerunt; quamuis suis næuis non caruerint; aut bene beateque in Domino sunt mortui. In numero autem

autem d̄m̄natorum; qui infelicit̄ & miserit̄ ex hac vita discesserunt; siue vita fini respondeat; siue à fine discrepet.

Itaque ex uno d̄m̄natorum spiritus d̄prehenduntur; infelici scilicet fine. Ex duobus purgandorum; fine felici, & anteacta pie vita. Et ex fine necessaria coniectura sumitur: ex vita, nisi finis aliud suadeat. probabilis.

In damnatis vnam cognoscendi rationem ponimus, finem inflictam. Nihil obest, quantumcunque pessimè transfacta vita; modò finis sit felix. In purgandis duas, finemq; à vita distinximus: Non quod existimemus omnes ad cælestes sedes transferendas, qui bene aliquando vixerunt: (multi bonam vitam male concludunt) sed quod bonam vitam aut raro, aut nunquam mors mala sequatur; ut ob id bene sperare debeamus & de iis, qui finem felicem habuerunt; & de iis, in quorum vita pietatis & charitatis argumenta claruerunt.

Quæ dicimus, extra controversiam apud Orthodoxos sunt omnia. Quocirca pro horum confirmatione frustra hic magnus labor susciperetur à Breuitatis amatoribus. Duo verò sunt, quæ quemadmodum difficultatem aliquam habent, ita non carent suo fructu & utilitate. Primum est, que vita dicatur bene transfacta: alterum, quamnam felicem mortem existimemus.

Prius in particulari definire impossibile est homini, nisi cui defineretur reuelatio facta est. Nescit homo, utrum ipse odio, vel amore dignus sit; poterit scire de altero? At in genere non modo non impossibile, verum etiam facile. Illa bene transfacta vita dicitur; qua pie, sobrie, & iuste vixit. Sobrietas nos bene erga nos ipsos; Iustitia erga proximum; Pietas erga Deum componit. Itaque qui Deo, quod Deo: proximo, quod proximo: sibi, quod sibi debetur, in vita tribuunt; iij bē se vixisse dicendi sunt.

Quod si quod dicitur, non ita intelligitur; bene vixisse dicuntur, qui post Baptisini Sacramentum suscepimus, nullo scelere lethali conscientiam commaculârunt; nec quicquam, quod diuinam maiestatem offendat, commiserunt; aut si quid commiserunt, illud rursus, Dei gratia præueniente, & consequente, dignis penitentiæ fructibus deposuerunt.

Felix mors non illa est, quæ quietis & tranquillitatis est plena; quæ caret graui doloris sensu: quæ astantibus nullum incutit horrorem; ubi plures adsunt consolantes amici: ubi insignis pompa funebris; & si quæ sunt alia. Hæc sceleratissimis possunt esse.

DE LOCIS INFESTIS

esse communia: sed quæ cum nulla peccati mortalis conscientia est coniuncta, & in qua nihil eorum, quæ Deus & Ecclesia postulat, prætermittitur.

10. Hinc est (ut ex contrario perspicuum fiat quod dicimus) ut primum illi infelicem mortem habeant; qui, quæ in vita peccata mortalia perpetrarunt, per pœnitentiam non deposuerunt. Hæc quoniam mortem præsentem animæ afferunt, animæ suam vitam non patiuntur restitui, quamdiu animam ipsa possident.

11. Deinde infeliciter illi obeunt, qui quamuis, quæ in vita commiserunt criminis dignis pœnitentiæ fructibus deposuerunt; in infirmitate tamen sua, vel in ipsis mortis portis Deum grauitate offendunt, nec offensæ veniam, aut querunt, aut obtinent. Hæc offensa, cùm aliis rationibus multis accidit, tum præcipue omissione Sacramentorum diuinitus institutorum; qualia sunt post Pœnitentiam Eucharistia atque Extrema vñctio.

12. Tertiò illi infeliciter hanc vitam concludunt, qui quamuis Sacramentorum nullù prætermittat; præteritæ etiam vite peccata dignis pœnitentiæ operibus deponant; bonorum tamen alienorum restitutionem, quam possunt, non faciunt. Diversa est, & vera B. Augustini sententia: Non dimittitur peccatum, nisi restituatur ablatum.

13. Hi infeliciter mori dicuntur, quemadmodum bene vivere illi, qui, quæ iusta, pia, & sobria sunt, perficiunt. Et ut de horum spiritibus bene speratur, quando mortale hoc corpus depónunt: ita de illorum salute timetur, quando tumultuari, post corporis sarcinā depositam, audiuntur.

14. Speramus bene de illis: quia bona principia bonos solent habere exitus. De horum salute timemus: quod horum peccata videantur esse ad mortem, quibus veniam negat Apostolus, 2. Ioan. 5. Veruntamen de neutrī certam, absolutamq; & quæ nullam exceptionem admittat, sententiam ferimus; quia seruus Domino suo cadit & flet, Rom. 14. Dominus etsi constitutus Iudex viuorum & mortuorum, Act. 10. Nobis dictum: Nolite iudicare, Matth. 7. Dies Domini omnis revelabit 1. Cor. 4.

15. Quocirca, quod diximus, probabile admodum est iudicium, quod ex vita sumitur & morte: non omnino certum. Quamuis raro habeat; potest tamen habere exceptionem. Nobis ut extra periculum simus, bonamq; spem habeamus, curandum; ut bona vita ad felicem, nos properemus mortem. ut inter bonos spiritus, cum Patre & spiritu m, in resurrectionis gloria inueniamur.

CAP.

An, & quomodo Spiritus humani, qui molesti sunt,
distinguuntur locis Catholicorum, &
Hæreticorum.

Loca Catholicis atque Hæreticis hominibus distincta, 1.
non quidem humanos à Dæmonum, sed tamen humanos
ab humanis Spiritibus distinguunt. Prius ostensum est capite
34. Posterior, qua ratione dicatur, explicandum est cap.
præsentis, sed brevissime.

Quando constat humanos esse Spiritus, qui apparent & molesti
sunt; omnino verisimile credimus; ut si apud Hæreticos inueniantur, dam-
natorum hominum sint; non vero eorum, qui igne purgatorio expiantur:
quam non contra, quicunque apud Catholicos obseruantur,
semper sint spiritus purgandi. Quocirca quamvis non ex Ca-
tholicorum locis; ex Hæreticorum tamen, conditio humanorum
spirituum deprehenditur.

Pro Assertionis confirmatione pluribus opus non est. Du-
bium nullum est Catholicorum locis, utrosque Spiritus reperiiri.
Vbi igitur docuerimus Hæreticis molestos non esse Spiritus purgando-
rum, finem Capiti inponemus, & demonstratum erit, damnato-
rum hominum spiritus esse, qui Hæreticos molestant.

Et hoc finis, qui hisce Spiritibus propositus est, aperte pro-
bat. Quid Hæreticorum locis quererent miseri purgandorum Spi-
ritus, quod sciunt se non inuenturos? Viuentium, scilicet, subsidia?
Aut illa possunt sperare subsidia ab illis, qui defunctos viuentium
subsidii negantiuari?

Et hoc quidem palam profitentur omnes propemodum no-
strorum temporum Hæretici. Lutherani rigidi, vt Centuriatores
Cent. 1.lib. 2.cap. 4. Lutherani molles, vt Philippus in locis, de Sa-
tisfactione; & Brentius in Confess. VVirtenb. zuuengiani apud
Cochleum in Actis Lutherianno 1526. Caluinistæ apud Caluinū
lib. 3. Institut. cap. 5 §. 6. Trinitarij Anabaptistæ lib. 2. cap. 1. ex iis,
quos nuper anno 1567 ediderunt. Quocirca his hi Spiritus mole-
sti non erunt.

Quanquam nec ad illos Hæreticos redire affectarent piè de.
functorum Spiritus, qui viuorum pro defunctis suffragia admit-
terent; Propterea quod quæ hi in defuctorum gratiam opera,
satisfactionesque susciperent, defunctis ad pœnarum aut nullum,

Y aut ad.

aut admodum paruum levamen prodeßent. quemadmodum ex iis, quæ posterius dicturi sumus manifestum erit.

7. Quocirca quod quidam docent, iis locis, vbi olim religio Catholica, nunc Hæretici sedem habet, spiritum molestias non obseruari; quæ olim erant frequentiores; omnino de horum spirituum molestiis intelligi credimus. ceteroqui alios, vel damnatorum hominum, vel Dæmoniorum Spiritus Hæreticis pacem fauere & relinquere, quæ probet nulla est causa.

CAP. XLVII.

An, Et ex quibus temporibus, possit distinctio inueniri inter humanos, eos Spiritus, qui loca infestare solent.

1. **N**firmum diximus esse cap. 35. & non satis certum iudicium, quo ex Temporibus distinguuntur spiritus Dæmoniorum & humani. Infirmitum quoque & non certum, quod hic humanos Spiritus prodit & distinguit. Quia tamen quantum, quantum illud sit, si cum aliis coniungatur, vires accipit; etiam hic, si non magnificiendum, certè non fuit omitendum.

2. Et, nisi fallimur, tribus temporum, quæ posuimus, differentijs purgandos Spiritus à damnatis quodam modo possumus distinguere; luce diei, diuturnitate molestiarum, & sanctitate: ut scilicet, quando iam constat humanos spiritus esse, qui apparent & molestant, ex ea probabile sit, purgandos esse, non damnatos; quod interdum obseruentur; quod diuinus sint molesti; quod sacri temporibus nobis adsint.

3. Dum hæc asserimus; non negamus, quin & noctibus hi ipsi purgandi Spiritus adesse possint: similiter breuiori tempore esse molesti; atque etiam profano. Docemus hæc tempora, nocturna inquam, breuiora, atque profana, magis Spiritibus damnatis conuenire: contraria verò, tanquam sibi peculiari ratione conuenientia postulare spiritus purgandos.

4. Dies refugiunt damnatorum hominum Spiritus: quia latere cupiunt: amant noctes, quia malè agunt, ideoque hostes sunt lucis Spiritus purgandi, si noctes querunt, non vt lateant querunt; sed vt necessitates suas mortalibus commedius explicit. Dies verò non refugiunt, si preposito suo intelligent seruire posse.

Dicitur.

Diuturnitate molestiarum superare videntur damnatos purgandi. Quamobrem autem? quia cum in damnatorum Spirituum, cum viuentibus, molesta consuetudine id propositum sit, ut miseria ipsorum mortalibus innotescat; tandem illa erit permittenda, quam fuerint, qui mortui neuerint. apud quos infames redi possunt: his deficientibus, cur rebus viuentium interesse debent, quæ virgeant, rationes magna non sunt. At purgandas propria sunt viuentium patrocinia, quæ ipsis, etiam ab ignotis, possunt communicari & impendi; ideoque multis post mortem annis.

Scio esse quosdam, qui tempus purgatoriarum pœnarum volunt esse paucorum annorum; apud quos nostra, quam damus, conjectura infirma est. Sed nobis illorum sententia magis aridet, qui illud producunt, nec itabreui apud omnes, volunt esse finiendas. Si breves pœnae; quomodo probat Ecclesia anniuersaria sacra; quæ pro iis, qui ante centum, & eo plures annos piè in Domino sunt defuncti, offeruntur? Vidi Bellarm. Tom. 1. contro. lib. 2. cap. 9.

Denique sacros dies refugere damnatorum hominum Spiritus, ex eo est verisimile, quod socij sint Dæmoniorum, qui & sacra detestantur omnia; & sacrorum omnium umbras. An vero possunt hos fugere spiritus purgandi? Annon præ reliquis expertere, si libera inter sacros & profanos dies detur optio? spiritus sacri sacrarum rerum appetentes? quarum consequendum, si aliis sacris profecto diebus spes est maior? Hæc de Temporibus breuius; propterea quod iudicium ex his petitum infirmius sit.

CAP. XLVIII.

An ex conditione illorum Spirituum, qui certis hominibus infesti esse solent, possit deprehendi,

Sitne Spiritus hominis damni, an salvandi, qui molestus est?

 Pus hic pluribus non est. Ex infectione ipsa, quod humanos spiritus inter se distinguat, nihil accipitur praesidij. Si quid hic est, quod differre faciat, Spiritusque conditionem prodat, hoc non ex ratione infectionis, sed ex aliis, quæ cum ipsa coniuncta sunt, habetur.

Prius extra controversiam est. Quemadmodum boni purgandorū

Y 2 homi-

hominum spiritus; ita mali damnatorum viuentes quosdam se-
quuntur. Hi quidem ut vexent, & molesti sint, illi vero, non tam
ut molestent & vexent; quam ut rebus suis apud viuentes con-
fulant.

3. Quæ vero cum insecutione & persecutione Spirituum con-
iuncta sunt, admodum varia sunt, sed quibus Spirituum condi-
tio deprehenditur potissimum, loca, Spirituum forma, mala qua af-
ferunt & molestandi modus. De quibus quoniam alias multis Capiti-
bus, nunc nihil præterea.

CAP. XLIX.

*An ex conditione illorum, qui per sequentes quosdam
patiuntur Spiritus, deprehendi possit ipsos Spi-
ritus esse damnatorum hominum, an
purgandorum.*

1.  Vemadmodum ex spiritibus certos homines in sequen-
tibus, & molestiis colligi nequit Spirituum hu-
manorum inter se discrimen; ita nec ex conditione homi-
num, qui hos molestantes spiritus patiuntur.
2. Diximus, Capite trigesimo septimo, duplice generis distingui
homines, qui patiuntur infestantes spiritus: alios egregiæ pro-
bitatis, alios perditæ salutis. Non necesse est dicamus purgandos
esse spiritus, à quibus boni patiuntur; damnatos, à quibus mali,
quia & mali possunt pati, patiunturque à Dæmonibus fre-
quenter.
3. Quando tamen aliunde constat de spiritibus, quod huma-
ni sint, ex conditione, si non bonorum, certè malorum, licet conyce-
re damnatorum esse spiritus qui molestant.
4. Quomodo vero? Quia boni & damnatorum & purgandorum
spirituum molestiis expositi sunt. Mali ferè non nisi dam-
natorum. Vtrumque quia Capite trigesimo septi-
mo astrictum est, repeti hic non
debet.

SYNOPSIS

Certorum signorum, ex præcedentibus Capitibus
Collectorum, quæ singulos Spiritus pro-
dant.

Distinximus Spiritus humanos à Spiritibus
Dæmoniorum: & humanos ab humanis. Ex
his, qui ex Spiritibus Dæmones sunt: qui hominum
damnatorum: qui purgandorum hominum, potest
quicunque colligere: veruntamen non sine la-
bore atque molestia: qua vi Lectorem subleuemus,
quæ sparsim dicta sunt, in certa Capita concludimus,
& singulorum Spirituum proprias quasi Notas at-
que indicia adscribimus.

CAP. L.

De oclo indicij, quæ magna sunt argumenta infe-
stantium Spirituum Dæmoniorum.

Dæmoniorum Spiritus oīo sunt argumenta, quæ singula
non leue; omnia timul iuncta firmum robur habent. Hæc
sunt, firma inconditi, soni, oratio, allata mala, obsequia, ioci, loca, & per-
sonæ, quæ molestantes spiritus sustinent.

Forma, siue species, quæ Dæmones prodit, est ab humana
discrepans, qualiscunq; illa sit; in primis vero brutorum animan-
tium, atque in nostrorum. Vide Caput 26.

Clamores & strepitus inconditi, qui alterum sunt signum, ma-
gnum videntur pro Dæmonibus argumentum; si barbarum ne-
scio quid, & peregrinum referant quoniam quemadmodum à ce-
teris Spiritibus videntur esse alieni, ita magnas ob causas Dæmo-
niorum proprij. Vide Caput 27.

Oratio, si Dæmonium debeat prodere, oportet sit diuinato-
ria, siue indicativa rerum, quas naturalis hominum cognitio ne-
quit percipere; siue illæ sint præteritæ, siue futuriæ, siue præsentes.
Vide Caput 28.

174

5. *Mala*, si magna sint & grauia, quæ viuentibus per Spiritus affe-
runtur, arguant ipsorum authores esse Dæmones. Nam & hæc per
Dæmones possunt afferri; per humanos Spiritus non item: & ut
per Dæmones, non verò per humanos Spiritus afferantur, omnino
conuenit. Vide caput 29.

6. *Ex Obsequijs* non uno modo cognoscuntur Dæmones. Dæmo-
nes sunt, qui Obsequia præstant humanas vires superantia; qui
nefanda, & leges naturæ violentia: qui ex pacto, quasi necessaria.
Vide caput 30.

7. *Ioci*, si excitantur, à Dæmonibus excitari admodum est veri-
simile, non ab humanis Spiritibus. Ex his igitur etiam, tanquam
Leonem ex vngue, Dæmones deprehenderis. Vide caput 31.

8. *Loca*, quæ Dæmonum sunt indicia, oportet sint deserta, & ab
hominū consuetudine aliena. Alia, quamvis iisdem Dæmones in-
ueniantur, quia tamen Dæmonum propria non sunt; Dæmones
non produnt Et in non-desertis quoq; illa Dæmones arguunt, quæ
tantum infesta sunt propter homines, impiam & sceleratam vitam
traducentes. Vide caput 32. & 33.

9. *Ex personis* etiam quibusdam de Dæmonibus sumitur conie-
ctura; illis scilicet, quæ perdite viuunt. Si has infestari à Spiritibus
contigerit, admodum est probabile à Dæmoniorum Spiritibus mo-
lestari. Vide caput 37.

CAP. LI.

*De quinque signis, quæ produnt Spiritus eos, qui pur-
gatorio adhuc igne expurgantur.*

1. **D**æmones ex signis octo cognoscimus, quemadmodum
dictum est: hominum verò purgandorum Spiritus ex
paucioribus, & fortè minus certis. quibus verò & quali-
bus? ex forma gemitu, oratione, obsequio, & lo. is.

2. *Forma*, quæ purgandorum spirituum index est, humana est;
talis; quæ peregrinum nihil obtineat; nullum horrorem per se
intuentibus afferat, vel truci vultu, vel atro colore. Vide Ca-
put 38.

3. *Gemitus & suspiria* oportet nulla sint aut levitate, aut impatiens
animi significatione permixta; & tristis, atque humilis mentis
certa indicia. Vide caput 39.

4. *Oratio* etiam hos spiritus prodit; oratio inquam, quæ peccato-
ceret, & insuper proprij boni cum submissi animi significatio-
nē est petitoria. Vide caput 40.

Obsequi

Obsequium, quod purgandorum Spirituum conditionem manifestat, omni debet carere labe peccati. Hoc ut certissimum est argumentum, ita difficulter admodum deprehenditur. At id tamen quodam modo cognoscendum faciunt constantia, humilitas & grauitas cum Obsequio coniuncta. Vide caput 42.

Loca, ex quibus purgandi spiritus deprehenduntur, duplia sunt; sacra, sed in primis Templū: & quæ primum post mortem alicuius fidelis, pie defuncti, infesta esse cœperunt. Illa malis Spiritibus non conueniunt: hæc omnino ipsos defunctos arguunt. Vide Caput 44.

C A P. LII.

*De tribus signis, quæ damnatorum hominum
Spiritus produnt.*

Non tot sunt indicia, quæ damnatorum hominum spiritus produnt, quod, quæ indicant Dæmones, vel purgandorum animas. & si diligentius omnia scrutemur, quæ certa, prater unum, admodum inueniemus pauca, vel nulla.

Certissimum est, *locus*, ille videlicet, primum spectris infestus esse cœpit post mortem hominum vel infidelium, vel si fidelium, misere, & non Christianè defunctorum. Vide caput 44.

Post hoc, sunt *forma*, atq; *genus*. Et *forma* oportet sit humana, sed ob crudelem, atrocemque vultum & colorem horrida. *Gemitus* verò atque *suspicio*, vel cum leuitatis, vel cum impatientiæ signis coniuncta. Hæc infirmiora sunt argumenta, quam primum: & inter ipsa, infirmissimum postremum. Vide caput 38 & 39.

Hæc damnatorum spirituum indicia: qualia, tandem. Alia, quæ prodant, nullæ sunt. Quæcunque enim vel ab his Spiritibus fieri possunt; quæcunque iis possunt accidere: quæcunque cum ipsis, quovis modo sunt coniuncta; nullo modo ita ipsis sunt propria; vt vel purgandis hominum Spiritibus, vel Dæmonibus nequeant conuenire.

Possunt excitare strepitus atq; clamores: possunt varias edere voces, & formare sermones: possunt nocere & molestare: possunt res de locis transferre. Quid horum non conuenit, si non purgandis certè Dæmonum Spiritibus?

Quæ ijs accident, sunt corporis moles vel paruitas; breuitas & diurnitas molestiarum, quas nobis afferunt; & si quæ sunt alia. Quid horum alienum ab aliis Spiritibus?

Coniuncta

7. *Coniuncta cum ipsis sunt loca, tempora atque personæ maximæ. Et ex temporibus sunt sacra profana: diurna nocturna. Ex locis sacra, non sacra: culta, non culta. Ex personis, probæ, improbæ: fideles, non fideles. An ab his alij Spiritus abhorrent?*

CAP. LII.

De adiuratione, quam molestantes Spiritus, per diuinum nominis invocationem coguntur, ut se, conditionemque suam prodant.

1. *Vamus persæpe, ex iam dictis argumentis, in Spirituum agnationem veniamus: non raro tamen accidit, ut vel his determinamur; vel si abundemus, perficte atque certò, quæ spirituum molestantium conditio sit, non cognoscamus. Alia igitur ratio est, qua ut certius agnoscantur; ita maiorem animum, in eo, qui illa vti velit, requirit.*
2. *Adiuratio illa dici potest; qua per Deum viuum, aut Crucifixi virtutem adiurantur, & coguntur Spiritus; ut qui, qualesue sint, prodant; & quid velint, quasue ob causas molesti sint, significant.*
3. *Magnas huinc esse vires ad Spiritus cogendos nemo dubitat. Nam qui boni sunt, ex reuerentia, qua Deum prosequuntur, non volent non suam conditionem prodere per Deum adiurati. Impij vero, & si Deum non reuereantur, timent tamen: & per ipsum adiurati faciunt; quæ, ut faciant, aliis machinis vix moverentur.*
4. *Hinc quos in plerisque sacrarum literarum locis adiuratos legimus homines, Adiurationis vim intelligentes, mox religione erga Deum ducti, præstiterunt quod rogarentur, vel iuberentur. Adiuratus senior seruus Abrahæ, ne filio uxorem acciperet, de filiabili Chananeorum, sed de cognitione, & domo patris Abrahæ; Domini sui mandato nihil prius habuit, Gen. 24. Adiuratus Ioseph à patre, ut in sepulchro, quod in terra Chanaan foderat, ipsum sepeliret; etiam intercedentibus Aegyptiis Pharaonem urget, quo promissioni, patriq; desiderio fiat satis. Genesi 50. Eiusdem Ioseph esse Moy. ses Aegyptum deserens, secum in terram promissam volunt transferre; quod viuens ille, hoc nomine filios Isræl adiurasset. Exodi 13. Adiuratus populus à Saul, cum Philisthijm persequeretur, ne quis patrem, usq; ad vesperam, comedeleret; donec hostes vltus esset; & non manducant*

manducavit vniuersus populus panem, vt dicitur 1. Reg. 14. Adiuratus Michæas Propheta ab Achab; & adiuratus, quam ante dissimulauerat, prædictis stragem in Israel, 3. Reg. 22. Adiuratus à summo Pontifice Filius Dei, Christus Dominus, vt diceret, essetne filius Dei, & pro reverentia Patris sui, studioque obsequendi Sacerdoti, qui antè tacuerat, locutus est. seqꝫ filium Dei esse est professus.

Neque Diaboli hanc Adiurationis vim ignorant. Hinc cùm ipsorum quidam malè sibi à domino timeret; ad adiurationem conuersos: Adiuro inquietat te, ne me torqueas. Marci 5. Vtrum verò adiuratione quicquam promouerit, ipse nouit: hoc certum, Gerasenorum regione, quod postulabat, pulsus non esse.

Sed de Adiurationis vi atque potestate dubium non est: dubium fortè, an licitum sit Spiritus adiurare; & qua adiurationis forma. Præterea, Quibus ipsa conueniat; Quibusue locis atque temporibus illa contra Spiritus utendum. De quibus, quid res postulat, breuiter pro ratione instituti.

Licere dubium non est. Cùm enim Spiritus; quicunque molesti sunt, vel Dæmoniorum sint, vel hominum; hoc ipso perspicuum est adiuratione licere omnes tentare, quod & Dæmonia & homines adiurare absqꝫ; vlo criminis permisum sit.

De hominibus hoc ostendunt, quæ initio capitilis huius ex scriptis literis allata sunt exempla. De Dæmoniis res gestæ Apostolorum; qui, potestate sibi diuinitus communicata, eadem adiurârūt, profligârunt, exulare iussérunt. Et bene B. Augustinus lib. 10. de Ciuit. Dei capite 22. Vera pietate, inquit, homines aëream potestatem in micam contrariamqꝫ; pietati exorcizando exiunt.

Forma adiurandi duplex est nunc præcipiendo, & veluti necessitatem imponendo quampli cogimus, vt diuini numinis causa quipiam faciat: nunc id facinus deprecando & hortando tantum. Huius proprius usus est ad superiores, quibus non conuenit, vt imperemus: posteriores, præceptoriae, inquam, ad inferiores, in quos potestatem habemus.

Sed qua vi spiritum statum, conditionemque explorare permisum? Vtraque permisum: licet præceptoria ut videatur securius.

Permissa deprecatoria: quia ita apud superiores locum habet; ut apud inferiores & pares reprehensione careat; aliquando etiam laude mereatur. Quocirca siue nobis superiores sint spiritus, qui molestant; siue pares, aut etiam inferiores; absque crimine sumus, si, ut se conditionemqꝫ; suam prodant, ipsos rogamus.

12. Permissa quoque præceptoria: quia multò melior conditio viuentium, quam spiritum, qui molestant: & ob id superiores illi quadam ratione dici debeant; & in ipsis imperio possint uti, maximè si incommodent.
13. Expedit nihilominus uti imperatoria & præceptoria: non solum idcirco, quod huius maiores sint vires, verum etiam, quia, ut plurimum, qui molestant, sunt spiritus Dæmoniorum, apud quos deprecatoria uti, religione prohibemur. *Nolo vos*, inquit Apostolus, *socios fieri Dæmoniorum*, t. Cor. II.
14. *Omnibus* verò existimarem licere spiritus adiuratoribus usq[ue] gere, licet non eodem omnibus fructu. Quamuis enim religionis actus sit adiuratio, & ad diuinum cultum spectet; ordinis tamen, & qui solis Deo consecratis personis conueniat, actus non est. Quicunque Deum inuocare possunt, spiritus, per Deum, ut conditionem suam prodant, possunt adiurare.
15. Cum fructu tamen semper hunc actum non omnes exercent. Exemplo illi sunt, quorum Actuum Apostolorum historia continet, Cap. 19. qui cum Dæmoniacos adiurarent per Deum, quem Paulus prædicaret, tantum abest, ut quicquam promouerint; ut in se experti sint crudeles, quibus ipsi dominari posse videbantur. Itaque qui Catholicam fidem non profitentur, adiurare spiritus per Deum possunt: feliciter (si tamen pro sua doctrinæ confirmatione hoc tentent) semper non possunt: quemadmodum neque eosdem ex humanis corporibus ejuscere: sicut alias demonstratum est: *Disputatione de Dæmoniacis*.
16. Atque ut hi frustra spiritus persæpe adiurant; ita adiurabunt veliter admodum, qui sacris iniciati, in Christi corpus, tam verum, quam mysticum, habent potestatem: non idcirco solum; quia magna est in Christi Ecclesia potestas, verum etiam, quia si vallis, his summa, in Dæmones, atque omnes molestantes spiritus collata potentia.
17. Et quamuis virtus & sanitonia ad hoc opus feliciter confidendum necessaria non sit; tutius tamen, atque confidentius maiori que cum spe victoriae, spiritus adiurabunt Sacerdotes, si cum potestate, qua possunt, virtus innocentia atque integritas sit coniuncta.
18. Proderit & virtutum exercitium præmisso; iejunij in quam, orationis, atque eleemosynarum. Quemadmodum haec præsidages alias arduas aggressuris, adiumento, temporibus omnibus fuerunt;

runt; ita hic frustra adhiberi, nullo modo dici debet. *Pietas*, inquit Apostolus, *ad omnia utilis est.* 1. Timoth. 4.

Quod verò præter hæc solida aduersus spiritus præsidia, etiam *sacris vestibus* sacerdotes induantur, damnari non debet. Dum suo officio satisfacit sacerdos; malè facit, si suo officio conuenientibus utatur vestibus?

Porrò, *Quibus locis atque temporibus* Adiuratio fieri debet? Iis 20.

quibus spiritibus, quos adiuramus, præsentes esse possumus. Quis Heripoll existens adiurabit eos, qui Constantinopoli sunt molesti? aut eos, quos, vtrum iam sint præsentes ignorat?

Quocirca, si nocte tantum molesti sunt spiritus; frustra interdiu, quando absentes putantur, adhibebitur *Adiuratio*, etiam iis locis, quibus alioquin molesti esse solent. Et si in sola vinaria cella tumultus excitantur; frustra adiurabuntur in solario. *Adiuratio* sine locutione non est; locutio ad præsentes est, non absentes.

Vtrum verò hoc vel illo modo præsentes esse spiritus obseruentur; ad rem parum facit sufficit si præsentes conspiciantur, sufficit si tumultu excitato præsentes esse credantur. Quemad-

modum loqui contingit præsentibus, tam iis, quos vide-

mus; quam quos audimus tantum: ita *adiurare* pos-

sumus tam eos, quos coram conspicimus;

quam quos auditu præsentes esse

cognoscimus.

Finis secunda partis de infestis locis.